

BOSNA I HERCEGOVINA
FEDERACIJA BOSNE I HERCEGOVINE
VLADA

N A C R T

ZAKON O IGRAMA NA SREĆU

Sarajevo, juni 2013. godine

ZAKON O IGRAMA NA SREĆU

I. OPĆE ODREDBE

Član 1.

Predmet zakona

Ovim zakonom uređuju se: uslovi, način i subjekti priređivanja igara na sreću, vrste igara na sreću, osnovna načela, postupak za izdavanje i oduzimanje odobrenja za priređivanje posebnih igara na sreću, pravila i raspoređivanja prihoda od igara na sreću, osnivanje, oblik organizovanja, organi upravljanja i rukovođenje Lutrijom Bosne i Hercegovine (u daljem tekstu: Lutrija BiH), naknada za priređivanje igara na sreću i naknade od uplata za učestvovanje u igrama na sreću, porezi na dobitke od igara na sreću, nadzor, kazne za prekršaje i druga pitanja od značaja za igre na sreću u Federaciji Bosne i Hercegovine (u daljem tekstu: Federacija).

Priređivanje igara na sreću na teritoriji Federacije realizuje se putem Lutrije BiH i pravnih lica registrovanih za priređivanje igara na sreću.

Član 2.

Igrom na sreću, u smislu ovog Zakona, smatra se igra u kojoj se za uplatu određenog iznosa učesnicima pruža mogućnost sticanja dobitka u novcu, stvarima ili pravima pri čemu krajnji rezultat igre ne ovisi o znanju ili umješnosti učesnika igre, već od slučaja ili nekog neizvjesnog događaja.

Član 3.

Značenje pojedinih pojmova

U smislu ovog Zakona pojedini pojmovi imaju sljedeće značenje:

1) **Pravo priređivanja igara na sreću** je pravo kojim se na osnovu ovog Zakona i odobrenja Federalnog ministarstva finansija – Federalnog ministarstva financija (u daljem tekstu: Ministarstvo), igre na sreću iz člana 4. ovog zakona mogu priređivati u obimu, na način i pod uslovima propisanim ovim zakonom;

2) **Priređivač** je pravno lice koje na osnovu ovog zakona i odobrenja Ministarstva, ima pravo priređivanja igara na sreću;

3) **Odobrenje** je upravni akt koji donosi federalni ministar finansija (u daljem tekstu: Ministar), a kojim se odobrava priređivanje igara na sreću uz ispunjavanje zakonom propisanih uslova za obavljanje djelatnosti priređivanja igre na sreću za koju se odobrenje daje;

4) **Naknada za priređivanje** je naknada koju priređivači plaćaju na osnovu ovog zakona, a smatra se javnim prihodom Federacije;

5) **Igre na sreću u casinu** su posebne igre na sreću koje igrači igraju protiv casina ili jedan protiv drugoga na stolovima za igru s kuglicama, kockicama ili kartama, u skladu sa odobrenim pravilima, a koje se priređuju isključivo u prostorima casina;

6) **Igre klađenja na sportske rezultate i druge neizvjesne događaje (kladioničke igre)**, su posebne igre na sreću u kojima učesnici (igrači) pogađaju ishode sportskih događaja i drugih neizvjesnih događaja predloženih od priređivača klađenja i odobrenih od strane Ministarstva, gdje okolnost koja odlučuje o dobitku ili gubitku ne smije biti nikome unaprijed poznata i mora biti takve naravi da na nju ne mogu utjecati ni priređivač ni igrači, a iznos dobitka ovisi o visini uloga po kombinaciji i o tečaju pojedinog događaja;

7) **Igre na sreću na automatima** jesu igre koje se igraju na mehaničkim, elektronskim ili sličnim uređajima na kojima igrači uplatom određenog iznosa (žetona, kovanica ili neposrednom uplatom na blagajni, odnosno na automatu) imaju mogućnost dobitka koji ovisi o slučaju ili nekom drugom neizvjesnom događaju. Ako se igraju na automatima sa više igračkih mjesta pod uslovom da ih opslužuje jedna centralna jedinica koja istovremeno generira igru na tim igračkim mjestima, također se smatraju jednim automatom za igre na sreću.

8) **Klasične igre na sreću** su igre u kojima učestvuje veći broj učesnika sa namjerom da budu jedini ili djelimični dobitnici unaprijed definiranog fonda dobitaka.

9) **Posebne igre na sreću** su igre gdje se pojedinac sam suprotstavlja priređivaču i očekuje dobitak ovisno o visini vlastitog uloga i pravila igre odobrenih od strane Ministarstva.

10) **Casino** je namjenski prostor za priređivanje posebnih igara na sreću odobrenih od strane Ministarstva, koje se priređuju na stolovima za igru s kuglicama, kockicama ili kartama (rulet, boule, chemin der fer, black-jack, trente quarante, baccarat, carps, texas holden poker, carriben poker, punto banco i sl.);

11) **Automat klub** je posebno uređen prostor za obavljanje djelatnosti priređivanja igara na sreću na automatima prema pravilima igre odobrenim od strane Ministarstva;

12) **Uplatna mjesta** za klađenje su posebno su uređeni prostori u kojima se na osnovu odobrenja Ministarstva i odobrenih pravila igre, primaju uplate za klađenje;

13) **Samoposlužni uplatni terminali** su uređaji na kome se uplata za igre za koje priređivač ima odobrenje vrši bez posredovanja prodavača, a koji su neprekidno povezani na centralni server priređivača;

14) **Sumnjiva transakcija** u smislu ovog zakona je svaka transakcija za koju nadležno tijelo procijeni da u vezi s njom ili s licem koje obavlja transakciju postoje razlozi za sumnju na pranje novca, finansiranje terorizma ili drugih protivzakonitih aktivnosti, odnosno da transakcija uključuje sredstva proizašla iz nezakonitih aktivnosti.

15) **Turnir u igrama na sreću** je takmičenje u kojem se učesnici takmiču u odigravanju određenih igara na sreću, pri čemu na osnovu uplaćene naknade za učestvovanje (kotizacije) stječu mogućnost uključenja u takmičenje i jednaku početnu poziciju, a na osnovu ostvarenih rezultata u igri mogućnost osvajanja dobitaka u unaprijed utvrđenim iznosima, koje osigurava priređivač turnira iz sredstava prikupljenih uplatom učesnika turnira ili iz vlastitih sredstava.

16) **Uplata putem SMS-a** je način uplate za učestvovanje u pojedinim klasičnim igrama na sreću i posebnoj igri klađenja gdje se cijena SMS usluga ne smatra uplatom za učestvovanje, tj. cijena SMS usluge ne prelazi iznos važeće cijene koja je utvrđena od strane operatera u redovnom telekomunikacijskom saobraćaju.

17) **Generator slučajnih brojeva** jest certificirani uređaj koji na osnovu slučajnih uzoraka generira slučajne, potpuno nezavisne i nepredvidive nizove brojeva ili simbola koji su jednoliko raspoređeni unutar definiranih granica.

18) **Porez na dobitke od igara na sreću i nagradnih igara** je porez koji se plaća prema mjestu prebivališta fizičkog lica kojem je isplaćen dobitak ostvaren učešćem u igri na sreću i/ili nagradnoj igri, a kada se radi o fizičkom licu koje nema prebivalište na teritoriji Federacije, obračunati i obustavljeni porez na ostvareni dobitak plaća se prema mjestu sjedišta isplatioca.

19) **Uplata u igrama na sreću klađenja** je novčani iznos koji učesnici (igrači) uplaćuju kod priređivača sa ciljem pogađanja ishoda jednog ili više sportskih i drugih neizvjesnih događaja predloženih od strane priređivača klađenja prema pravilima odobrenim od strane Ministarstva.

20) **Naknada za priređivanje igara na sreću klađenja** je iznos u visini 5% od uplate učesnika (igrača) koji je priređivač dužan na teret igrača obustaviti prilikom svake uplate.

21) **Ulog u igrama na sreću klađenja** je iznos koji se dobije kada se na teret učesnika (igrača) od uplate oduzme iznos od 5% na ime naknade za priređivanje igara na sreću klađenja.

($ULOG = UPLATA - NAKNADA\ 5\% \text{ NA TERET IGRAČA}$)

22) **Dobitak u igrama na sreću klađenja** je iznos koji se dobije kada se ulog pomnoži sa ukupnim koeficijentom svih događaja na jednom tiketu na čiji je ishod učesnik (igrač) pogađao, i isti u slučaju ostvarenog dobitka predstavlja osnovicu za obračun i obustavu poreza na dobitke od igara na sreću.

($DOBITAK = ULOG \times UKUPNI\ KOEFICIJENT$)

Član 4.

Vrste igara na sreću

Igre na sreću dijele se na: klasične (lutrijske) i posebne igre na sreću.

Klasične igre na sreću su igre u kojima se unaprijed utvrđuje visina fonda dobitaka i to:

- 1) srećka: robna, novčana, robno-novčana, ekspres srećka, instant srećka,
- 2) loto, keno i druge varijante ove igre i dodatne igre koje se priređuju uz osnovnu igru i koriste isti listić,
- 3) sportska prognoza – toto i dodatne igre koje se priređuju uz osnovnu igru i koriste isti listić,
- 4) tv tombola – Bingo i dodatne igre koje se priređuju uz osnovnu igru i koriste istu karticu,
- 5) tombola - Bingo u zatvorenom prostoru.

Posebne igre na sreću su igre u kojima se unaprijed ne utvrđuje fond dobitka i to:

- 1) Igre u casinu,
- 2) Igre na automatima u posebnim klubovima,
- 3) Igre klađenja na sportske rezultate i druge stvarne neizvjesne događaje.

Član 5.

Učesnik u igri na sreću

Učesnik igre na sreću je lice koje ispunjava uslove učestvovanja u pojedinim igrama na sreću, što dokazuje pojedinačnim listićem odnosno drugom potvrdom o uplati, zavisno od vrste igre u kojoj učestvuje i pravilima pojedine igre.

Licima mlađim od 18 godina zabranjeno je učestvovanje u svim igrama na sreću.

Član 6.

Naknade

Lutrija BiH plaća mjesečnu naknadu u iznosu od 10% od ukupnog prometa ostvarenog priređivanjem igara na sreću iz člana 4. stav 2. ovog zakona.

Osnovicu za uplatu naknade iz stava 1. ovog člana kod svih oblika srećki čini ukupna vrijednost prodanih srećaka, odnosno ukupna vrijednost primljenih uplata za pojedinu igru.

Mjesečnu naknadu iz stava 1. ovog člana, Lutrija BiH uplaćuje u korist budžeta Federacije najkasnije desetog dana u tekućem mjesecu za prethodni mjesec, a dokaz o uplati mjesečne naknade Lutrija BiH je dužna dostaviti nadležnom uredu Porezne uprave Federacije Bosne i Hercegovine (u daljem tekstu: Porezna uprava) najkasnije do dvadesetog dana u tekućem mjesecu za prethodni mjesec.

Iznos sredstava koji se uplaćuje u skladu sa st. 1. i 2. ovog člana ima karakter troška poslovanja Lutrije BiH.

Član 7.

Raspodjela dijela prihoda po osnovu naknada od igara na sreću

Prihodi ostvareni po osnovu naknada za priređivanje igara na sreću prihod su Federacije.

Dio prihoda ostvarenih po osnovu igara na sreću, raspodijelit će se za finansiranje programa i projekata udruženja građana i humanitarnih organizacija koji se odnose na:

- 1) liječenje teško oboljele djece i mladih koje je jedino moguće da se provodi van Bosne i Hercegovine,
- 2) zaštitu prava djeteta koja su žrtve zlostavljanja, pedofilije, prosjačenja,
- 3) zadovoljavanje potreba lica sa invaliditetom u smislu poboljšanja životnih uslova i rada njihovih organizacija,
- 4) učestvovanje u borbi protiv droga i ovisnosti,
- 5) smještaj i utočište žrtvama torture i nasilja (sigurne kuće)
- 6) promicanje razvoja profesionalnog i amaterskog sporta u cilju povećanja sredstava fonda za nagrađivanje za istaknute sportske rezultate,
- 7) promoviranje tehničke kulture i udruženja koja se bave inovacijama za nagradni fond za nagrađivanje inovatora za inovacije od međunarodnog značaja,
- 8) rad javnih kuhinja.

Za finansiranje programa i projekata iz stava 1. ovog člana izdvaja se:

- 1) 50% mjesečne naknade za priređivanja klasičnih lutrijskih igara na sreću (član 6. stav 1.),
- 2) 50% od naknada za priređivanja igara na sreću u casinima (član **74. st. 1. i 2. i član 75. stav 1.**),
- 3) 50% od naknada za priređivanje igara klađenja (član **93. st. 1. i 2.**),
- 4) 50% od naknade za priređivanje igara na sreću na automatima (član 110. st. 1. i 2.),
- 5) 50% od naknade za priređivanje igara na sreću putem interneta (član 122. st. 1. i 2.).

Vlada Federacije Bosne i Hercegovine (u daljem tekstu: Vlada Federacije) će na prijedlog Ministarstva propisati kriterije za utvrđivanje korisnika i način raspodjele sredstava.

Ministarstvo će sredstva uplaćena od strane priređivača u skladu sa stavom 3. ovog člana, voditi na posebnom transakcijskom računu za prikupljanje prihoda od igara na sreću.

Član 8.

Porez na dobitke od klasičnih (lutrijskih) igara na sreću

Porez na dobitke ostvarene u klasičnim igrama na sreću obračunava se i naplaćuje pri isplati svakog pojedinačno ostvarenog dobitka, a obračun i uplatu obavlja priređivač igara na sreću.

Osnovicu za obračun poreza na novčane dobitke čini novčani iznos svakog pojedinačno ostvarenog dobitka, a osnovicu za obračun poreza na dobitak kod onih dobitaka koji se sastoje od stvari, usluga ili prava čini tržišna vrijednost stvari, usluga ili prava koje čine pojedinačni dobitak.

Porez na dobitke plaća se po stopi od 10% na dobitke iznad 50,00 KM do 10.000,00 KM, a po stopi od 15% na dobitke iznad 10.000,00 KM.

Član 9.

Priređivanje igara

Priređivanje igara na sreću je isključivo pravo Federacije, ako ovim zakonom nije drugačije određeno.

Pravo priređivanja igara na sreću iz člana 4. ovog zakona Federacija prenosi na Lutriju BiH, kojoj za priređivanje nije potrebno posebno odobrenje Ministarstva.

Druga pravna lica, registrovana za priređivanje igara na sreću na teritoriji Federacije, mogu pod uslovima predviđenim ovim zakonom, na osnovu odobrenja Ministarstva, priređivati igre iz člana 4. stav 3. ovog zakona.

Član 10.

Igre na sreću iz člana 4. ovog zakona priređuju se na osnovu ovog zakona i odobrenja Ministarstva.

Član 11.

Postupak izdavanja odobrenja

Posebne igre na sreću mogu priređivati:

- 1) Lutrija BiH u skladu sa članom 9. stav 2. ovog zakona,
- 2) privredna društva sa sjedištem u Federaciji koja su registrovana za priređivanje posebnih igara na sreću predviđenih ovim zakonom, na osnovu odobrenja Ministarstva.

Rješenje o davanju odobrenja za priređivanje posebnih igara na sreću donosi Ministarstvo na zahtjev pravnih lica iz člana 9. stav 3. ovog zakona.

Rješenje iz stava 2. ovog člana, pored elemenata propisanih Zakonom o upravnom postupku, obavezno sadrži:

- 1) naziv i sjedište pravnog lica,
- 2) vrstu igara na sreću koje se mogu priređivati,
- 3) datum počinjanja priređivanja igara na sreću,
- 4) period trajanja odobrenja,
- 5) visinu i način plaćanja naknada za izdavanje odobrenja.

Član 12.

Pravno lice koje je na osnovu odobrenja iz člana 10. ovog zakona steklo pravo na priređivanje igara na sreću iz člana 4. stav 3. ovog zakona, ne može to pravo prenositi na druga pravna lica.

U slučaju bilo kakve promjene vlasničke strukture priređivača, Ministarstvo će na zahtjev priređivača provesti postupak odlučivanja o zadržavanju prava na priređivanje igara iz člana 4. stav 3. ovog zakona.

Uz zahtjev iz stava 2. ovog člana, pravno lice mora priložiti potvrdu banke o izvršenoj provjeri porijekla sredstava uplaćenih za kupovinu vlasničkog udjela, te drugu dokumentaciju na zahtjev Ministarstva.

Priređivač je dužan u roku od sedam dana obavijestiti Ministarstvo o promjeni svakog podatka ili okolnosti koji se tiču:

- 1) članova uprave i nadzornog odbora priređivača,
- 2) drugih lica ovlaštenih za zastupanje i vođenje poslova priređivača,
- 3) drugih okolnosti bitnih za poslovanje i rad priređivača.

Član 13.

Odobrenje za priređivanje igara na sreću, izdato u skladu sa ovim zakonom, oduzet će se priređivaču ako:

- 1) se dokaže da je odobrenje dodijeljeno na osnovu netačnih ili neistinitih podataka,
- 2) priređivač nije počeo sa priređivanjem igara u roku određenom u odobrenju,
- 3) se utvrdi da priređivač ne ispunjava propisane tehničke, informatičke i ostale uslove,
- 4) priređivač krši pravila igara na sreću odobrenih od strane Ministarstva,
- 5) priređivač ne plaća obaveze propisane ovim ili drugim zakonom, ili igračima ne isplaćuje dobitke,
- 6) priređivač ne dopušta ili na drugi način sprečava nadzor, propisan ovim zakonom ili otežava sprovođenje nadzora,
- 7) netačno prikazuje ili prikriva ostvareni promet,
- 8) pozajmljuje novac igračima,
- 9) krši odredbe iz odobrenja za priređivanje igara na sreću,
- 10) nadležni organ sazna za činjenice i okolnosti koje su postojale u vrijeme izdavanja odobrenja, a koje prema odredbama ovog zakona predstavljaju prepreku za izdavanje odobrenja,
- 11) ako priređivač igara ne održava vrijednost osnovnog kapitala propisanu ovim zakonom.

Član 14.

Rješenje o oduzimanju odobrenja za priređivanje igara na sreću izdatog u skladu sa ovim zakonom, donosi Ministar po službenoj dužnosti ili na prijedlog Porezne uprave.

Rješenje o oduzimanju odobrenja pored elemenata propisanih Zakonom o upravnom postupku ("Službene novine Federacije", br. 2/98 i 48/99), obavezno sadrži:

- 1) naziv i sjedište priređivača kojem se oduzima odobrenje,
- 2) vrstu igara na sreću za koje se odobrenje oduzima,
- 3) datum stupanja na snagu zabrane priređivanja igara na sreću,
- 4) odredbe o drugim obavezama priređivača u vezi sa oduzimanjem odobrenja,
- 5) razloge zbog kojih se odobrenje oduzima.

Na sva pitanja koja nisu propisana odredbama ovog zakona, a koja se odnose na postupak koji provodi Ministarstvo, primjenjuju se odredbe Zakona o upravnom postupku.

Član 15.

Klasične (lutrijske) igre priređuju se isključivo putem Lutrije BiH pod uslovima predviđenim ovim zakonom, izuzev igre na sreću tombola bingo u zatvorenom prostoru koju mogu priređivati sportska društva i sportski savezi na osnovu odobrenja Porezne uprave, isključivo u zatvorenim prostorima i ista se ne može javno prenositi.

Član 16.

Isplata dobitaka

Za isplatu dobitaka u klasičnim (lutrijskim) igrama koje priređuje Lutrija BiH jamči Federacija.

Za isplatu dobitaka u posebnim igrama na sreću jamče priređivači cjelokupnom svojom imovinom.

Član 17.

Zabavne igre

Zabavne igre (pod kojima se smatraju igre na računarima, igraćim konzolama, simulatorima, automatima za video igre, fliperima, bilijarima i drugim sličnim automatima koji se stavljaju u pogon pomoću kovanog novca, žetona ili uz naplatu, a u kojima igrač ne može ostvariti dobitak u novcu, stvarima ili pravima) nisu igre na sreću u smislu ovog zakona.

Član 18.

Nagradne igre

Nagradni konkurs i nagradne igre koje priređuju pravna lica s ciljem propagande nisu igre na sreću u smislu ovog zakona i iste se mogu organizovati pod uslovom da se učestvovanje u igri ne naplaćuje posebno, da se nagrade isplaćuju u proizvodima ili uslugama, da se unaprijed uplati 6% od ukupne vrijednosti nagradnog fonda i to: ravnomjerno po 1,5 % Crvenom križu, „Caritas“, „Merhamet MDD“ i „Dobrotvoru“ i da se pravila igre, uz prethodno odobrenje Ministarstva, objave u dnevnoj štampi.

Ukupna vrijednog nagradnog fonda kojeg sačinjavaju proizvodi i usluge čija se vrijednost utvrđuje po tržišnim cijenama, ne može prelaziti iznos od 200.000,00 KM.

Prijavlivanje učesnika u nagradnim igrama putem poziva u svim oblicima elektronskih komunikacijskih mreža te putem SMS usluga ne smatra se posebnom uplatom za učestvovanje, pod uslovom da cijena po pozivu odnosno SMS usluzi ne prelazi iznos važeće cijene koja je utvrđena od strane operatera u redovnom telekomunikacijskom saobraćaju.

Prijavljivanje učesnika u raznim vrstama igara koje se priređuju putem poziva u svim oblicima elektronskih komunikacijskih mreža, te putem SMS usluga, obavlja se u skladu sa stavom 3. ovog člana.

Nagradna igra ne može biti priređena po pravilima igara na sreću, a priređivač nagradne igre ne može formirati fond dobitaka uplatama učesnika nagradne igre.

Nagradnom igrom ne smatraju se društvene igre znanja (kvizovi). Društvena igra znanja (kviz), u smislu ovog zakona, jest igra koja se odvija pred javnošću, a u kojoj se u vještini, spretnosti i znanju iz različitih područja takmiče jedan ili više unaprijed kvalifikovanih učesnika prema pravilima priređivača uz obavezno prisustvovanje učesnika mjestu priređivanja kviza, pri čemu pobjeda zavisi isključivo o postignutim rezultatima u zadanoj tematici. U društvenu igru znanja jedan ili više unaprijed kvalifikovanih igrača uključuje se isključivo na temelju iskazane vještine i spretnosti, odnosno znanja.

Pravo, uslove, sadržaj pravila igre i način priređivanja nagradnih igara, propisat će Ministar posebnim propisom.

Član 19.

Porez na dobitke ostvarene u nagradnim igrama

Porez na dobitke ostvarene učešćem u nagradnim igrama, plaćaju fizička lica-dobitnici nagrada predviđenih pravilima nagradne igre.

Porez na dobitke iz stava 1. ovog člana obračunava se i naplaćuje pri isplati svakog pojedinačno ostvarenog dobitka odnosno preuzimanju nagrade od strane dobitnika, a obračun, obustavu i uplatu obavlja priređivač nagradne igre.

Osnovicu za obračun poreza na dobitke iz stava 1. ovog člana, čini tržišna vrijednost stvari, usluga ili prava svakog pojedinačno ostvarenog dobitka.

Porez na dobitke ostvarene u nagradnim igrama plaća se po stopi od 10% na pojedinačne dobitke čija je tržišna vrijednost iznad 1000,00 KM do 10.000,00 KM, a po stopi od 15% na pojedinačne dobitke čija je tržišna vrijednost iznad 10.000,00 KM.

Član 20.

Zabranjene aktivnosti

U smislu odredbi ovog zakona, zabranjeno je:

- 1) zaprimanje uplata i priređivanje putem interneta svih igara na sreću čije priređivanje putem interneta nije dozvoljeno u skladu sa ovim zakonom,
- 2) oglašavanje i reklamiranje svih priređivača koji priređuju igre na sreću putem interneta bez odobrenja Ministarstva,
- 3) priređivanje igara na sreću zasnovano na upotrebi sistema Video lutrijskih terminala (VLT),

- 4) priređivanje tzv. dopisnih igara koje se zasnivaju na geometrijskoj progresiji, dopisivanju i uplaćivanju određenog iznosa, i svih drugih tzv. piramidalnih igara, koje nisu igre na sreću u smislu ovog zakona,
- 5) učestvovanje u inostranim igrama na sreću ili igrama drugog entiteta odnosno distrikta, na način da se uplate vrše na teritoriji Federacije,
- 6) prikupljanje uplata na teritoriji Federacije BiH za učestvovanje u igrama na sreću koje se priređuju u inostranstvu, drugom entitetu odnosno distriktu,
- 7) prodaja, držanje, ustupanje, izdavanje, oglašavanje i svako drugo predstavljanje inostranih srećki i tiketa (listića) za igre na sreću na teritoriji Federacije, osim u slučaju priređivanja igara na način propisan članom 29. ovog zakona,
- 8) priređivanje igara na sreću u slobodnim zonama.

Izuzetno od odredbe stava 1. tačke 5. i 6. ovog člana, dozvoljeno je da pojedinac posjeduje srećke i tikete (listiće) inostranih igara na sreću radi ličnog učestvovanja u igri na sreću, ako su ulози uplaćeni u inostranstvu.

II. LUTRIJA BiH

Član 21.

Registracija i djelatnost

Lutrija BiH je društvo s ograničenom odgovornošću registrovano kod nadležnog suda, u kome Vlada Federacija Bosne i Hercegovine vrši sva prava i dužnosti Federacije Bosne i Hercegovine kao osnivača društva.

Sjedište Lutrije BiH je u Sarajevu.

Djelatnost Lutrije BiH je priređivanje svih vrsta igara na sreću i igara za zabavu u skladu sa ovim zakonom i za priređivanje istih Lutriji BiH nije potrebno odobrenje Ministarstva.

Lutrija BiH u registraciju može upisati i ostale prateće djelatnosti koje su u funkciji obavljanja osnovne djelatnosti u skladu sa odlukom Nadzornog odbora.

Na pitanja koja nisu obuhvaćena ovim zakonom, a koja se odnose na poslovanje Lutrije BiH, primjenjuju se odredbe Zakona o privrednim društvima ("Službene novine Federacije BiH", br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10).

U slučaju sukoba pojedinih odredaba ovog zakona i Zakona o privrednim društvima, primjenjivat će se odredbe ovog zakona.

Član 22.

Upravljanje

Organi upravljanja Lutrije BiH su:

- 1) Skupština,
- 2) Nadzorni odbor,
- 3) Uprava.

U Lutriji BiH formira se Odbor za reviziju.

Član 23.

Skupština

Vlada Federacije u okviru vršenja prava i dužnosti osnivača Lutrije BiH ima ovlaštenja skupštine društva, pri čemu između ostalog:

- 1) odlučuje o usvajanju izvještaja o poslovanju za prethodnu godinu uz davanje saglasnosti na plan poslovanja, odnosno na revidirani plan poslovanja za narednu godinu,
- 2) donosi odluku o raspodjeli dobiti društva,
- 3) odlučuje o načinu pokrića eventualnog gubitka,
- 4) donosi statut i njegove izmjene i dopune koje predloži nadzorni odbor,
- 5) odlučuje o povećanju i smanjenju osnovnog kapitala,
- 6) odlučuje o promjenama oblika organizovanja i statusnim promjenama,
- 7) daje upute i smjernice nadzornom odboru,
- 8) imenuje i razrješava nadzorni odbor,
- 9) na prijedlog nadzornog odbora imenuje i razrješava Odbor za reviziju,
- 10) odlučuje o drugim pitanjima u skladu sa zakonom i drugim propisima.

Član 24.

Nadzorni odbor

Nadzorni odbor je sastavljen od pet članova.

Članove nadzornog odbora u skladu sa zakonom i drugim propisima, imenuje i razrješava Vlada, na prijedlog Federalnog ministra finansija/financija.

Nadzorni odbor Lutrije BiH u okviru svojih nadležnosti između ostalog:

- 1) razmatra i donosi plan poslovanja za narednu godinu, i razmatra izvještaj o poslovanju za prethodnu godinu, i isti zajedno sa prijedlogom za raspodjelu dobiti najkasnije do kraja prvog kvartala tekuće godine dostavlja Ministarstvu na mišljenje i Vladi na usvajanje,

- 2) donosi pravila igara na sreću,
- 3) imenuje upravu,
- 4) daje inicijativu za izmjene propisa u oblasti igara na sreću,
- 5) predlaže Ministarstvu davanje saglasnosti i verifikaciju ugovora o priređivanju zajedničkih igara na sreću s lutrijama drugih država, drugog entiteta i drugim specijaliziranim organizacijama,
- 6) provodi postupak izbora kandidata za članove Odbora za reviziju i podnosi Vladi prijedlog za njihovo imenovanje,
- 7) putem Ministarstva Vladi Federacije BiH predlaže donošenje statuta i njegovih izmjena i dopuna,
- 8) obavlja i druge poslove iz svoje nadležnosti propisane zakonom i drugim propisom.

Član 25.

Uprava

Lutrijom BiH rukovodi direktor, koji čini upravu društva.

Upravu Lutrije BiH imenuje i razrješava Nadzorni odbor Lutrije BiH uz saglasnost Ministarstva na period od četiri godine uz mogućnost produženja mandata.

Član 26.

Odbor za reviziju

Predsjednika i članove Odbora za reviziju Lutrije BiH imenuje Vlada, na prijedlog nadzornog odbora dostavljen Vladi, nakon odabira kandidata izvršenog na osnovu provedenog postupka po javnom konkursu.

Nadzorni odbor je dužan da nakon provedenog postupka iz stava 1. ovog člana, u svojstvu kandidata predloži lica koja su najkvalifikovanija za tu funkciju.

Član 27.

Predsjednik i član odbora za reviziju ne može biti član nadzornog odbora ili uprave, zaposlen niti imati direktni ili indirektni finansijski interes u Lutriji BiH, izuzev plaće po osnovu te funkcije.

Naknada i druga prava članova odbora za reviziju uređuju se odlukom direktora, uz prethodnu saglasnost Federalnog ministarstva finansija/financija.

Član 28.

Statut

Lutrija BiH ima Statut kojim se uređuje naročito:

- 1) firma i sjedište,
- 2) djelatnost,
- 3) iznos osnovnog kapitala,
- 4) vođenje poslovanja i zastupanje društva,
- 5) podjela dobiti, snošenje rizika i način pokrića gubitaka,
- 6) upravljanje, postavljanje, razrješenje, ovlaštenje, odgovornost, nagrađivanje i ostalo,
- 7) unutrašnja organizacija,
- 8) statusne promjene,
- 9) trajanje i prestanak djelatnosti,
- 10) postupak izmjene i dopune Statuta,
- 11) druga pitanja od značaja za poslovanje,

Član 29.

Igre na sreću predviđene ovim zakonom Lutrija BiH može priređivati i u saradnji s lutrijama drugih država, drugog entiteta kao i sa drugim specijalizovanim organizacijama.

Ministarstvo daje saglasnost za priređivanje igara na sreću iz stava 1. ovog člana.

Član 30.

Igre na sreću predviđene ovim zakonom Lutrija BiH može realizirati u poslovnoj saradnji s drugim pravnim licima, trgovinskim, zanatskim i ugostiteljskim radnjama registrovanim, pored ostalog, i za promet roba i usluga.

Član 31.

Lutrija BiH može biti član međunarodnih i domaćih strukovnih udruženja.

III. KLASIČNE (LUTRIJSKE) IGRE NA SREĆU

Član 32.

Pravila klasičnih lutrijskih igara na sreću

Pravila klasičnih igara na sreću su akt koji donosi priređivač igre na sreću kojim se regulišu prava i obaveze Lutrije BiH kao isključivog ovlaštenog priređivača sa jedne strane i učesnika igre na sreću, sa druge strane.

Pravila igre na sreću tombola - Bingo u zatvorenom prostoru, koji priređuju sportska društva i sportski savezi odobrava Porezna uprava.

Član 33.

Uslovi za priređivanje pojedine klasične igre na sreću propisuju se pravilima igre koja za svaku vrstu igre donosi Lutrija BiH.

Član 34.

Pravila igre za priređivanje klasične igre na sreću obavezno moraju sadržavati sljedeće:

- 1) naziv i sjedište priređivača,
- 2) naziv, opis i vrijeme trajanja igre na sreću,
- 3) uslovi učestvovanja u igri na sreću,
- 4) mjesto u kojem se igra priređuje, odnosno teritoriji na kojoj se obavlja prodaja srećki i uplatnih listića,
- 5) pojedinačnu cijenu srećke (kombinacije),
- 6) krajnji rok učestvovanja u igri,
- 7) količinu i novčanu vrijednost emisije srećaka,
- 8) visinu fonda i vrstu dobitaka,
- 9) opis srećke i uplatnog listića,
- 10) način, postupak i nadzor izvlačenja, odnosno način utvrđivanja dobitaka,
- 11) način objavljivanja iznosa fonda dobitaka i rezultata igre,
- 12) način i rok isplate novčanih dobitaka,
- 13) način upoznavanja učesnika igre s pravilima igre,
- 14) postupak u slučaju otkazivanja izvlačenja.

Član 35.

Pravila klasičnih igara na sreću ne mogu se mijenjati nakon što je počela prodaja srećaka odnosno uplata određenog kola.

Lutrija BiH je obavezna pravila klasičnih igara na sreću javno objaviti u dnevnoj štampi prije početka igre na sreću, i na prodajnim mjestima licima zainteresovanim za učestvovanje u igri omogućiti upoznavanje s pravilima učestvovanja u igri.

Član 36.

Izvlačenje dobitaka

U klasičnim igrama na sreću u kojima se dobitne kombinacije utvrđuju izvlačenjem, izvlačenje se mora obavljati pred komisijom od najmanje tri člana koje imenuje priređivač, pri čemu se za jednog od članova komisije imenuje ovlašteni službenik Ministarstva.

Ako se klasične igre na sreću organizuju na način utvrđen u članu 29. ovog zakona, a izvlačenje dobitaka se obavlja na teritoriji druge države ili entiteta sastav komisije i način izvlačenja će se obaviti prema propisima koji se primjenjuju na teritoriji na kojoj se vrši izvlačenje dobitaka.

Prije početka izvlačenja klasične lutrije priređivač mora utvrditi broj prodanih srećki, te neprodane srećke zapečatiti pred komisijom i ovlaštenim licem iz stava 1. ovog člana.

Član 37.

Ministarstvo može, iz opravdanih razloga na zahtjev Lutrije BiH, odobriti promjenu mjesta izvlačenja dobitaka ili dana izvlačenja, ali najduže za petnaest dana.

Lutrija BiH mora promjenu mjesta ili odgodu dana izvlačenja dobitaka objaviti na isti način na koji su objavljena pravila o priređivanju klasičnih igara na sreću.

Ako se prema st. 1. i 2. ovog člana odgodi dan izvlačenja dobitaka priređivač može nastaviti prodavati srećke do dana određenog za izvlačenje.

Lutrija BiH može odgoditi priređivanje igre na sreću, kola ili serije, za koju je započela prodaja srećke ili primanje uplata, pod uslovom da vrati igračima uplaćeni novac od prodaje srećki.

Član 38.

O toku izvlačenja članovi komisije vode zapisnik, kojeg svi potpisuju, a koji mora sadržavati: mjesto i vrijeme, način izvlačenja dobitaka, broj prodanih srećki, odnosno ukupnu uplatu u tom kolu ili seriji, izvučene dobitne kombinacije te moguće primjedbe učesnika igre.

Zapisnik o toku izvlačenja priređivač dostavlja Ministarstvu najkasnije u roku od sedam dana od dana obavljenog izvlačenja.

Član 39.

Izveštaj o rezultatima izvlačenja ili utvrđivanja dobitaka priređivač mora javno objaviti najkasnije sedam dana od dana izvlačenja, u jednim dnevnim novinama kao i na prodajnim mjestima.

Član 40.

Fond dobitaka

Fond dobitaka u klasičnim igrama na sreću utvrđuje se od osnovice koju čini ukupna vrijednost emisije srećaka, ili ukupna vrijednost uplate za učestvovanje u igri, umanjena za naknade iz člana 6. ovog zakona.

Iznos fonda dobitaka u pojedinoj igri na sreću iz stava 1. ovog člana po pojedinom kolu ili seriji igre na sreću mora biti objavljen prije izvlačenja dobitaka.

Fond dobitaka u pojedinoj klasičnoj (lutrijskoj) igri na sreću, odnosno u pojedinom kolu ili seriji igre na sreću, mora iznositi najmanje 50% osnovice iz stava 1. ovog člana i isplaćuje se u skladu sa pravilima igre na sreću.

Izuzetno od stava 3. ovog člana, fond dobitaka u klasičnoj (lutrijskoj) igri na sreću TV - tombola Bingo mora iznositi najmanje 60% osnovice iz stava 1. ovog člana.

Član 41.

Isplata dobitaka

Isplata novčanog dobitka, odnosno preuzimanje dobitaka druge vrste u klasičnim igrama na sreću, obavlja se u roku određenom pravilima igre na sreću, koji ne može biti duži od 30 dana od dana objavljivanja izvještaja o rezultatu igre na sreću.

Identitet dobitnika je moguće objaviti isključivo uz njegovu pismenu saglasnost.

Po isteku roka iz stava 1. ovog člana, nadležna služba kontrole Lutrije BiH i komisija koju odredi priređivač precizno evidentira broj i ukupnu sumu neisplaćenih dobitaka po svakoj pojedinačnoj igri na sreću.

Sredstva iz stava 3. ovog člana se moraju vratiti igračima kroz uvećanje fonda dobitaka iz konkretne ili bilo koje druge igre na sreću.

O dinamici isplate ovih sredstava odlučuje direktor Lutrije BiH o čemu obavještava Ministarstvo.

Član 42.

Štampanje srećaka, listića

Srećke (robne, novčane, robno-novčane), tombolske listiće i druge potvrde za učestvovanje u igri iz člana 4. ovog zakona, mogu štampati odabrani proizvođači koji ugovorom o konkretnom poslu, garantuju najmanje sljedeće: tačnost fonda dobitaka, dogovoreni broj dobitnih i nedobitnih srećki i njihov raspored, kvalitetu proizvoda kroz sigurnost kvalitete emulzije, garantuje tajnost podataka.

Srećke ekspres, instant lutrije, mogu štampati štamparije koje ispunjavaju sljedeće uslove:

- 1) da se radi o eminentnom proizvođaču koji radi, odnosno štampa za veći broj lutrijskih organizacija,

- 2) da odabrani proizvođač ugovorom o konkretnom poslu, garantuje najmanje: tačnost fonda dobitaka, dogovoreni broj dobitnih i nedobitnih srećki i njihov raspored, kvalitetu proizvoda kroz sigurnost kvalitete emulzije, garantuje tajnost podataka

Odluku o odabiru štamparije iz stava 1. ovog člana donosi direktor Lutrije BiH.

Član 43.

Srećka

Srećka može biti prema strukturi fonda dobitaka:

- 1) robna,
- 2) novčana
- 3) robno-novčana.

Prema načinu izvlačenja dobitaka, srećka može biti:

- 1) klasična s tačno utvrđenim datumom izvlačenja,
- 2) ekspres i instant kod kojih je dobitak odštampan na srećki.

Član 44.

Loto, keno i druge varijante ove igre

Loto je klasična igra na sreću u kojoj se izvlačenje brojeva vrši lopticama gdje se putem elektroničkog uređaja vrši izvlačenje brojeva, koji u skladu s pravilima igre, predstavljaju dobitnu kombinaciju.

Član 45.

Javno izvlačenje dobitaka lota i TV Tombole - Bingo vrši se direktno u TV prijenosu, putem Javnog emitera.

Član 46.

Loptice na loto, keno i druge varijante ove igre trebaju imati odgovarajući atest od proizvođača loptica u skladu sa pravilima igre na sreću.

Član 47.

Sportska prognoza - Toto

Sportska prognoza - Toto je igra na sreću zasnovana na prognoziranju rezultata nogometnih takmičenja domaćih ili stranih liga jedanput ili više puta sedmično.

Član 48.

Priredivači igara na sreću, njegovi članovi, partneri, zaposleni kao i druga lica koja rade za priredivača, obavezni su čuvati tajnu o igračima i njihovim uplatama i dobitcima u klasičnim igrama na sreću.

Ako radnici nadležnih tijela uprave u obavljanju svojih poslova saznaju za činjenice koje podliježu tajnosti iz stava 1. ovog člana, obavezni su ih čuvati kao službenu tajnu.

Član 49.

TV tombola-Bingo

TV tombola - Bingo je igra na sreću u kojoj se javno izvlače brojevi i to u direktnom TV prijenosu.

Priredivanje TV tombole-Bingo je isključivo pravo Lutrije BiH.

Član 50.

Tombola - Bingo u zatvorenom prostoru

Tombola - Bingo u zatvorenom prostoru je igra na sreću koju priređuju sportska društva i sportski savezi na osnovu odobrenja Porezne uprave.

Odobrenje iz stava 1. ovog člana izdaje se na godinu dana pod uslovom da je podnosilac zahtjeva:

- 1) registrovan za priređivanje ove vrste igre na sreću,
- 2) vlasnik neophodne opreme za priređivanje ove igre na sreću,
- 3) osigurao adekvatan prostor s tačno naznačenom adresom, koji se ne nalazi u objektu kolektivnog stanovanja, za koji ima dokaz o pravu vlasništva ili ugovor o zakupu poslovnog prostora,
- 4) omogućio fizički pristup igrača u prostoru u kojem se igra priređuje, a da se prostor u kome se priređuju navedene igre na sreću ne nalazi u radijusu od 100 m od vjerskih, obrazovnih i kulturnih ustanova i objekata, za što posjeduje Izvod iz katastarskog plana sa podacima o udaljenosti izdat od strane nadležne općinske službe,
- 5) donio pravila igre s ugrađenim instrumentima kontrole.

Član 51.

Priredivači tombole - Bingo u zatvorenom prostoru ne mogu se udruživati radi zajedničkog priređivanja ove igre na području dvije ili više općina.

Član 52.

Priredivač tombole - Bingo u zatvorenom prostoru može stavljati u promet samo tombolske kartice koje je izdala Porezna uprava.

Tombolske kartice se mogu isključivo prodavati - distribuirati u prostoru u kojem se igra priređuje.

Cijena tombolske kartice je jedinstvena na teritoriji Federacije i utvrđuje je Porezna uprava.

Porezna uprava može izdati tombolske kartice samo priredivaču koji ima odobrenje za priređivanje tombole - Bingo u zatvorenom prostoru.

Porezna uprava je dužna za svakoga priredivača tombole - Bingo u zatvorenom prostoru voditi evidenciju o količinama i serijama izdatih tombolskih kartica.

Član 53.

Tombola - Bingo u zatvorenom prostoru se može priređivati jednom ili više puta sedmično, u skladu sa pravilima igre.

Član 54.

Detaljnije uslove za priređivanje klasičnih (lutrijskih) igara na sreću i tombole bingo u zatvorenom prostoru propisat će Ministar.

IV. POSEBNE IGRE NA SREĆU

1. Igre u casinima

Član 55.

Pravo priređivanja

Posebne igre na sreću u casinima može priređivati:

- 1) Lutrija BiH pod uslovima predviđenim ovim zakonom,

- 2) Privredna društva registrirana za posebne igre na sreću sa sjedištem na teritoriji Federacije, koja se upisuju u sudski registar za obavljanje djelatnosti posebnih igara na sreću u casinima, na osnovu ovog zakona i odobrenja Ministarstva.

Na privredna društva iz stava 1. ovog člana primjenjuju se odredbe Zakona o privrednim društvima ako ovim zakonom nije drugačije uređeno.

Član 56.

Ministarstvo izdaje prethodno odobrenje za registraciju privrednih društava iz člana 55. stav 1. tačka 2. ovog zakona.

Uz zahtjev za izdavanje odobrenja iz stava 1. ovog člana, privredno društvo je obavezno da:

- 1) podnese dokaze da je izvršilo polog novčanog dijela osnivačkog kapitala,
- 2) dostavi osnivački akt sa podacima o osnivačima, visini pojedinačnih uloga, ime i naziv osnivača,
- 3) osigura licitacijsku garanciju banke sa klauzulom „bez prigovora“ u visini 1.000.000,00 KM sa periodom važenja 12 mjeseci, izdatu od banke sa sjedištem u Federaciji,
- 4) dostavi elaborat o osnivanju i poslovanju casina,
- 5) dostavi pravila o radu casina,
- 6) dostavi pravila za svaku vrstu igre na sreću koja će se priređivati u casinu.

Član 57.

Igre na sreću u casinima pod uslovima propisanim ovim zakonom mogu se priređivati i sezonski u neprekidnom periodu od najmanje četiri do najviše šest mjeseci u jednoj kalendarskoj godini, i to najviše u dva casina.

Član 58.

Vrsta i obim igara

Osim igara na sreću u casinima, koje se priređuju na stolovima za igru s kuglicama, kockicama ili kartama (rulet, boule, chemin der fer, black-jack, trente quarante, baccarat, carps, texas hold'em poker, carriben poker, punto banco i sl.), mogu se u posebno uređenim i fizički odvojenim prostorima priređivati i igre na sreću na automatima, te razne vrste turnira.

Ako se u casinu priređuju igre na sreću na automatima, priređivač je dužan imati Centralni računarski sistem (Server) za on-line nadzor koji mora biti povezan sa računarskim sistemom Porezne uprave na način da omogući uspostavu sistema nadzora.

Casino mora imati odgovarajući softver koji zadovoljava sve tehničke uslove u vezi sa priređivanjem igara i arhiviranjem podataka u bazi podataka koji osigurava najveću moguću sigurnost za sprečavanje promjene podataka.

Vrste i obim posebnih igara na sreću iz stava 2. ovog člana, kao i promjenu istih, odobrava Ministarstvo.

Broj stolova za igre u casinima mora biti najmanje pet.

Član 59.

Za priređivanje raznih vrsta turnira, priređivač iz člana 55. stav 1. tačka 2. mora dobiti odobrenje Ministarstva.

Uz zahtjev za izdavanje odobrenja za priređivanje turnira, priređivač je dužan priložiti podatke o iznosima uplata učesnika.

Član 60.

Prostorni tehnički i drugi uslovi za casino

Casino je namjenski prostor kojeg čini zasebna građevinska cjelina površine najmanje 500m² u kojem se priređuju igre na sreću propisane članom 58. ovog zakona.

Prostor casina se sastoji od djela za igru posebnih igara na sreću, ugostiteljskog dijela, pomoćnih prostorija kao i posebno uređen i odvojen prostor za priređivanje igara na sreću na automatima.

Izuzetno, priređivanje posebnih igara na sreću u casinima može biti u hotelskim objektima kategorije četiri i više zvjezdica, u skladu sa uslovima propisanim u stavu 2. ovog člana.

Član 61.

Casino mora imati deviznu blagajnu i odvojen zaštićen prostor za čuvanje novca i drugih vrijednosti.

Uplate i isplate kod igara na sreću u casinima određuju se u konvertibilnim markama ili u stranoj valuti ako je to u skladu sa važećim propisima o deviznom poslovanju.

Priređivač mora osigurati neprekidni audio-video nadzor u casinu sa snimanjem, tako da se osigura neprekidan i neposredan nadzor.

Video nadzor, te snimanje i čuvanje podataka video nadzora, kao i način postavljanja i ugradnje tehničkih sredstava i uređaja priređivač je dužan provoditi u skladu sa važećim zakonima i podzakonskim aktima koji uređuju pitanje tehničke zaštite ljudi i imovine.

Podaci iz dokumentacije iz stava 4. ovog člana predstavljaju poslovnu tajnu, a priređivač ih može saopćiti drugim licima u skladu sa zakonom.

Priređivač mora nadzirati igrače i posjetioce da bi se igra mogla odvijati u skladu sa odredbama ovog zakona.

Ostale prostorne i tehničke uslove za priređivanje igara na sreću u casinima, propisat će Ministar.

Član 62.

Pravila casina i igara na sreću u casinima

Priređivač je dužan donijeti pravila casina koja se moraju staviti na uvid posjetiocima i istaći na oglasnoj ploči, te biti u saglasnosti sa dobrim poslovnim običajima.

Pravila casina sadrže:

- 1) vrste posebnih igara na sreću koje se priređuju u casinu,
- 2) uslove za ulazak u casino (kontrola posjetilaca),
- 3) uslove kada je pojedinim igračima zabranjen pristup u casino ili učešće u igrama na sreću,
- 4) radno vrijeme casina.

Član 63.

Posjeta casinu i učestvovanje u igri dopušteno je samo punoljetnim osobama koje svoj identitet dokazuju identifikacijskom ispravom, te koje se registruju prilikom ulaska u objekt na za to predviđenom mjestu.

U casinu nije dopušteno unošenje tehničkih pomagala prikladnih za pribavljanje prednosti u igri.

Uprava casina može određenim licima ili grupama, zabraniti ili ograničiti učestvovanje u igrama na sreću u casinu ako postoji utemeljena pretpostavka da učestalost i intenzitet njihovih učestvovanja u igri dovode u opasnost njihov egzistencijalni minimum, te ako to zatraže njihovi članovi porodice, njihov zakonski staratelj ili ustanove koje se bave zaštitom porodica u slučajevima kad igrač zbog nekontroliranog igranja nanosi štetu sebi ili porodici koju uzdržava, a da za to ne mora navesti razloge za takvu odluku.

Uprava casina može trajno ili privremeno zabraniti učestvovanje u igrama na sreću u casinu licima koji na bilo koji način narušavaju red i mir u prostorima casina.

Član 64.

Zaposleni u casinu moraju ispunjavati sljedeće uslove:

- 1) zaposleni u casinu koji neposredno sudjeluju u priređivanju igara na sreću moraju biti stručno osposobljeni za rad u casinu, te biti u radnom odnosu na neodređeno vrijeme,
- 2) zaposleni u casinima ne smiju učestvovati u ulozi igrača u casinu u kojem rade,
- 3) zaposleni u casinu moraju da kao poslovnu tajnu čuvaju podatke o igračima do kojih su došli pri obavljanju svog posla,
- 4) zaposlenima u casinu zabranjeno je da od igrača uzimaju proviziju, poklone ili usluge bilo koje vrste i nije im dozvoljeno da novčano pomažu igrače.

Dopušteno je da igrači daju napojnicu za osoblje casina, koja se stavlja u posebne kutije predviđene za tu namjenu. Sa napojnicama se postupa u skladu sa pravilima casina koja donosi priređivač.

Od podjele napojnica izuzeti su članovi uprave casina i rukovodeće osoblje.

Član 65.

Pravila za svaku vrstu posebnih igara na sreću, pravila priređivanja turnira u casinu, propisuje priređivač.

Pravila koja donosi priređivač iz člana 55. stav 1. tačka 2. ovog zakona, primjenjuju se nakon dobivene saglasnosti Ministarstva.

Pravila igara na sreću moraju biti sastavljena na jednom od službenih jezika u Federaciji, te prevedena na engleski jezik i dostupna igračima.

Pravila igre ne mogu se mijenjati u toku trajanja igre na sreću koju su igrači počeli nakon uplate iznosa za učestvovanje u jednoj igri na sreću, te se igra do svršetka odvija po istim pravilima.

Pravila koja donosi priređivač iz člana 55. stav 1. tačka 2. ovog zakona, na koja Ministarstvo nije dalo saglasnost u postupku izdavanja odobrenja za priređivače iz člana 55. stav 1. tačka 2., ne mogu se primjenjivati.

Član 66.

Igračima koji u toku igre na sreću prekrše pravila igre, igračima koji unesu tehnička pomagala za pribavljanje prednosti u igri, priređivač može zabraniti dalje učestvovanje u igrama i prisustvo u casinu.

Član 67.

Preseljenje casina na novu lokaciju

Ministarstvo može odobriti preseljenje casina na novu lokaciju uz prethodno podnošenje zahtjeva za preseljenje od strane priređivača.

Zahtjev mora sadržavati:

- 1) posebno obrazloženje razloga preseljenja,
- 2) dokaz o vlasništvu ili pravu korištenja prostora (po osnovu zakupa, lizinga, itd.) u koji se preseljava,
- 3) dokaz o ispunjavanju uslova iz čl. 58., 60. i 61. ovog zakona.

Priređivač je dužan da na novoj lokaciji počne raditi u roku od šezdeset dana od dana dobivanja odobrenja za preseljenje.

Član 68.

Odobrenje za priređivanje igara na sreću u casinu

Igre na sreću u casinu priređuju se na osnovu odobrenja Ministarstva koje se izdaje na period od pet godina, sa mogućnošću ponovnog produženja. Odobrenje se može i oduzeti pod uslovima propisanim ovim zakonom.

Za dodjelu i oduzimanje odobrenja za priređivanje igara na sreću u casinu primjenjuju se odredbe čl. 9. do 14. ovog zakona.

Član 69.

Uz zahtjev za izdavanje odobrenja za priređivanje igara na sreću u casinima prilažu se:

- 1) podaci o nazivu firme i sjedištu pravnog lica,
- 2) dokaz o uplati naknade za priređivanje igara na sreću u casinu,
- 3) rješenje o registraciji pravnog lica,
- 4) potvrdu banke o izvršenoj provjeri porijekla sredstava uplaćenih za kupovinu vlasničkog udjela, za polog sredstava namjenskog depozita iz člana 72. ovog zakona i sredstava uplaćenih po osnovu naknade iz člana 74. ovog zakona,
- 5) osnivački akt pravnog lica,
- 6) dokaz o uplati osnivačkog kapitala,
- 7) poslovni plan pravnog lica,
- 8) garanciju banke ili potvrdu o pologu namjenskog depozita u skladu sa članom 72. ovog zakona,

- 9) za prostor koji odgovara uslovima iz čl. 60. i 61. ovog zakona, dokaz o vlasništvu, pravu korištenja prostora (po osnovu zakupa) i da se ne nalazi u objektu kolektivnog stanovanja, da se isti ne nalazi u radijusu od 100 m od vjerskih, obrazovnih i kulturnih ustanova i objekata, za što posjeduje Izvod iz katastarskog plana sa podacima o udaljenosti izdat od strane nadležne općinske službe,
- 10) pravila casina,
- 11) podaci o vrsti i broju kao i detaljni podaci za identifikaciju svih stolova za igru, automata za igre kao i ostalih uređaja za igre na sreću koji su predviđeni za postavljanje u casino, te dokaz za iste da je priređivač vlasnik,
- 12) podaci o licima koja neposredno sudjeluju u priređivanju igara na sreću, dokaz o njihovom stručnom obrazovanju i osposobljenosti za obavljanje poslova u casinu,
- 13) navođenje vrste i obima igara,
- 14) pravila za svaku vrstu posebnih igara koja će se priređivati kao i pravila za priređivanja turnira u casinu,
- 15) dokaz da ovlaštena lica nisu osuđivana za krivična djela protiv privrede i platnog prometa i da se protiv njih za ta djela ne vodi krivični postupak,
- 16) dokaz o izmirenim poreznim obavezama (uvjerenje/potvrda izdata od strane Porezne uprave Federacije Bosne i Hercegovine i Uprave za indirektno oporezivanje Bosne i Hercegovine),
- 17) odnosno dokaz o ranijem iskustvu, preporuke i odobrenja koja je posjedovao (ako postoji),
- 18) izjavu priređivača da mu ranije nije bilo oduzeto odobrenje u zemlji ili u inostranstvu, i da nije osuđen za krivično djelo utaje poreza,
- 19) dokaz o izmirenim poreznim obavezama osnivača, ukoliko je pravno lice novi pravni subjekt.

Član 70.

Priređivač je dužan u roku od sedam dana obavijestiti Ministarstvo o promjeni svakog podatka ili okolnosti koje se odnose na:

- 1) članove uprave priređivača,
- 2) druga lica ovlaštena za zastupanje i vođenje poslova priređivača,
- 3) identitet lica koje sudjeluje u osnovnom kapitalu u pravnom licu,
- 4) druge okolnosti bitne za poslovanje i rad priređivača.

Član 71.

Osnivački kapital, novčana osiguranja i naknade

Pored uslova propisanih čl. 58, 60. i 61. ovog zakona, za dobivanje odobrenja za priređivanje igara na sreću u casinima, priređivači iz člana 55. stav 1. tačka 2. ovog zakona moraju imati osnivački kapital koji ne može biti manji od 2.000.000,00KM.

Član 72.

Radi osiguranja isplate dobitaka igračima i podmirenja obaveza po osnovu uplate javnih prihoda, za cijeli period važenja odobrenja iz člana 68. stav 1., priređivači iz člana 55. stav 1. tačka 2. ovog zakona moraju imati činidbenu garanciju banke sa klauzulom „bez prigovora naplativa na prvi poziv“ u visini 1.000.000,00 KM izdatu od banke sa sjedištem u Federaciji ili namjenski depozit u istom iznosu.

Nakon što priređivači Ministarstvu u postupku izdavanja odobrenja dostave činidbenu garanciju iz stava 1. ovog člana, Ministarstvo je dužno vratiti priređivaču licitacionu garanciju dostavljenu u skladu sa članom 56. stav 2. tačka 3) ovog zakona.

Sredstva osiguranja iz garancije i namjenskog depozita iz stava 1. ovog člana imaju karakter osiguranja isplate dobitaka i obaveza po osnovu uplate javnih prihoda, a koriste se kad su iscrpljena sva ostala sredstva kojima raspolaže priređivač. Ako se iznos ovih sredstava smanji priređivač prestaje s radom.

Ako priređivač u roku od 30 dana od dana kada su sredstva garancije i depozita smanjena, ista ne popuni do punog iznosa sredstava, ukida se odobrenje za priređivanje igre na sreću u casinima, uz prethodno namirenje svih obaveza prema Federaciji kroz pljenidbu sredstava ili realizaciju bankarske garancije.

U slučaju smanjenja iznosa sredstava namjenskog depozita iz stava 1. ovog člana banka koja je izdala garanciju odnosno kod koje je položen namjenski depozit priređivača, dužna je o tome bez odlaganja obavijestiti Ministarstvo.

Član 73.

Priređivači iz člana 55. stav 1. tačka 2. ovog zakona dužni su dnevno u blagajni casina imati riziko depozit od najmanje 100.000,00 KM za casino igre i najmanje 500,00 KM po svakom automatu za igre na sreću.

Porezna uprava je dužna svakih trideset dana počev od dana izdavanja odobrenja vršiti kontrolu iznosa sredstava iz stava 1. ovog člana.

Član 74.

Priredivači iz člana 55. stav 1. tačka 2. ovog zakona plaćaju jednokratnu naknadu za izdavanje odobrenja za priređivanje igara na sreću u casinu u iznosu od 500.000,00 KM.

Naknada za produženje važenja odobrenja iznosi 200.000,00 KM.

Dokaz o uplati naknade iz st. 1. i 2. ovog člana dostavlja se prilikom podnošenja zahtjeva za izdavanje odnosno produženje odobrenja.

Član 75.

Priredivači iz člana 55. stav 1. tačka 2. ovog zakona plaćaju godišnju naknadu po jednom casinu u iznosu od 100.000,00 KM.

Naknada iz stava 1. ovog člana plaća se najkasnije do kraja godine za koju se ista plaća.

Svi priredivači igara na sreću u casinima dužni su plaćati mjesečnu naknadu od prihoda igara na sreću koje priređuju. Mjesečna naknada za priređivanje igara u casinima iznosi 5% od osnovice za obračun naknade iz stava 4. ovog člana, a uplaćuje se u korist budžeta Federacije, najkasnije desetog dana u tekućem mjesecu za prethodni mjesec.

Osnovicu za obračun mjesečne naknade čini zbir dnevnih obračuna svih stolova i zbir dnevnih obračuna svih automata. Osnovicu za obračun mjesečne naknade kod igara koje igrači igraju jedan protiv drugoga (chemin de feer, texas holdem poker i slično) čini postotak uplate koji priredivač zadržava od svih igrača. Priredivač sačinjava mjesečni obračun odvojeno za stolove i automate. Mjesečni obračun je konačan.

Dnevni obračun po pojedinom stolu za igre na sreću u casinu obavlja se način da se završno stanje vrijednosti žetona na stolu uvećava za svotu novca zamijenjenog za žetone na stolu, koji se spremne u posebne kutije (drop) i za iznos visine kredita, te umanju za dopunu u žetonima (dotaciju) za vrijeme rada stola i za vrijednost početnog stanja žetona na stolu (završno stanje+drop+kredit-dotacija-početno stanje=dnevni obračun stola).

Dnevni obračun pojedinog automata za igre na sreću utvrđuje se tako da se iznos svih uplata umanju za iznos isplaćenih dobitaka igračima, a razlika predstavlja dnevni obračun za pojedini automat za igre na sreću. Automati s više sjedećih mjesta smatraju se jednim automatom i za njih se vodi poseban dnevni obračun.

Za priređivanje turnira u casinima priredivač plaća naknadu u visini 25% od osnovice (reik), koju čini postotak uplate koji priredivač zadržava od svih uplata učesnika turnira, a uplaćuje se u korist budžeta Federacije BiH najkasnije petnaestog dana u tekućem mjesecu za prethodni mjesec.

Priredivač Poreznoj upravi mjesečno podnosi izvještaje o ostvarenim prihodima po vrstama igara.

Ukupna vrijednost promotivnih žetona ne može biti veća od 2 % od mjesečnog prihoda casina.

Promotivne nagradne igre u casinu su robne i vrijednost nagradnog fonda ne može biti veća od 5 % prihoda casina za period u kome se nagradna igra organizuje.

Priredivač je dužan da na propisanim obrascima vodi podatke o dnevnim obračunima po pojedinom stolu za igre na sreću pomoću kojih je izrađena mjesečna osnovica za obračun i plaćanje naknade.

Naknada iz stava 3. ovog člana plaća se za prethodni mjesec, najkasnije do 10-og u mjesecu za prethodni mjesec.

2. Kladioničke igre

Član 76.

Vrsta i obim kladioničkih igara

Kladioničke igre su posebne igre na sreću u kojima učesnici (igrači) u skladu sa pravilima igre pogađaju ishode različitih sportskih i drugih događaja sa neizvjesnim rezultatom kao što su:

- 1) klađenje na rezultate pojedinačnih ili grupnih sportskih takmičenja,
- 2) klađenje na uspjeh plesnih, pjevačkih, muzičkih i sličnih takmičenja,
- 3) ostale neizvjesne događaje prema ponudi priredivača uz odobrenje Ministarstva.

Vrste i obim posebnih igara na sreću klađenja, kao i promjenu istih, odobrava Ministarstvo.

Član 77.

Pravo priređivanja

Kladioničke igre mogu priređivati:

- 1) Lutrija BiH pod uslovima utvrđenim ovim zakonom,
- 2) Privredna društva sa sjedištem na teritoriji Federacije, koja se upisuju u sudski registar za obavljanje djelatnosti kladioničkih igara, na osnovu ovog zakona i odobrenja Ministarstva.

Član 78.

Primanje uplata za klađenje

Uplate za igre klađenja primaju se:

- 1) putem terminala na uplatnim mjestima u zasebnom prostoru (u daljem tekstu: uplatna mjesta),
- 2) putem samoposlužnih terminala za klađenje instaliranih na uplatnim mjestima (u daljem tekstu: samoposlužni terminali),
- 3) putem SMS poruke.

Broj uplatnih mjesta na kojima priređuju klađenja propisana članom 76. ovog zakona nije ograničen.

Promjenu lokacije uplatnog mjesta sa jedne adrese na drugu odobrava Ministarstvo na zahtjev priređivača.

Član 79.

Priređivači iz člana 77. stav 1. tačka 2. ovog zakona na uplatnom mjestu na osnovu odobrenja Ministarstva mogu priređivati klađenja zasnovana na snimljenim događajima (snimci utrka konja, utrka pasa i sličnih utrka) i kompjuterski generisanih događaja sa dodatkom TV monitora u kojima se za izbor događaja koristi hardverski uređaj generator slučajnih brojeva (RNG Random Number Generator).

U svrhu izdavanja odobrenja za priređivanje igara na sreću iz stava 1. ovog člana, priređivač iz člana 77. stav 1. tačka 2. ovog zakona je dužan Ministarstvu podnijeti zahtjev za odobrenje pravila igara, te dostaviti certifikat o usklađenosti generatora iz stava 1. ovog člana izdat od strane ovlaštenog pravnog lica koje je u skladu sa ovim zakonom ovlašteno da certificira automate i sisteme za igre na sreću. Certifikat, između ostalog, mora sadržavati ispitivanje slučajnosti (random).

Priređivači iz člana 77. stav 1. tačka 2. ovog zakona moraju za svako uplatno mjesto i svaku vrstu klađenja imati odobrenje za priređivanje igara iz stava 1. ovog člana.

Ministarstvo finansija može u svakom trenutku o trošku priređivača zatražiti provjeru slučajnosti (random) igara koje su zasnovane na korištenju generatora iz stava 1. ovog člana. Provjeru ispravnosti obavlja ovlašteno pravno lice.

Član 80.

Priređivač iz člana 77. stav 1. tačka 2. ovog zakona na uplatnom mjestu, na osnovu odobrenja Ministarstva, može priređivati klađenja na brojeve lota različitih država, izuzev klađenja na brojeve klasičnih igara na sreću koje u skladu sa ovim zakonom priređuje Lutrija BiH.

Za izdavanje odobrenja za priređivanje klađenja iz stava 1. ovog člana, priređivač mora dostaviti pismenu saglasnost inostranih lutrija na čije brojeve se priređuje klađenje.

Član 81.

Terminali i samoposlužni terminali moraju biti povezani sa Centralnim računarskim sistemom priređivača gdje se evidentira svaka uplata izvršena radi učestvovanja u igri.

Samoposlužni terminal mora imati uređaj za primanje novčanica („bill acceptor“), printer („ticket printer“) i mehaničke brojčanike.

Uplate za igre klađenja putem terminala i samoposlužnih terminala mogu se primati isključivo na uplatnim mjestima.

Broj samoposlužnih terminala koji jedan priređivač može instalirati na uplatnim mjestima nije ograničen.

Član 82.

Prostorni i tehnički uslovi za kladionice

Priređivač može priređivati igre klađenja u uplatnim mjestima čija površina nije manja od 15 m².

Član 83.

Priređivači igara na sreću klađenja moraju imati direktnu on-line vezu svakog uplatnog mjesta sa serverom Porezne uprave.

Softver priređivača mora zadovoljavati sve tehničke uslove oko priređivanja igre i arhiviranja podataka u bazi koja osigurava najveću moguću sigurnost za sprečavanje promjene podataka.

Softver iz stava 2. ovog člana mora omogućiti vjerodostojno praćenje, bilježenje i pohranjivanje podataka o primljenim uplatama i isplatama klađenja te osigurati nepromjenjivost primljenih podataka.

Ostale prostorne i tehničke uslove za priređivanje igara na sreću klađenja, propisat će Ministar.

Član 84.

Pravila kladionice i pravila klađenja

Priređivač je obavezan da vidno na svakom uplatnom mjestu istakne oznaku koja sadrži podatke o priređivaču, lokaciji, roku važenja, serijskom broju oznake i radno vrijeme, a koju izdaje Porezna uprava.

Radno vrijeme kladionica može trajati od 7 sati do 23 sata svaki dan nezavisno od toga da li je u to vrijeme, zakonom ili drugim propisom određen neradni dan.

Član 85.

Opis klađenja i uslove za učestvovanje u pojedinim igrama klađenja priređivač je dužan da propiše pravilima klađenja koja moraju biti vidno istaknuta na svakom uplatnom mjestu priređivača.

Pravila klađenja koja donosi priređivač iz člana 77. stav 1. tačka 2. ovog zakona, primjenjuju se nakon dobivene saglasnosti Ministarstva.

Član 86.

Pravila obavezno moraju sadržavati sljedeće:

- 1) podatke o nazivu firme i sjedištu priređivača,
- 2) datum i naziv tijela priređivača koje donosi pravila igre,
- 3) naziv i opis igre,
- 4) opis i vrijeme trajanja klađenja,
- 5) uslove za učestvovanje u klađenju,
- 6) područje na kojem se klađenje priređuje,
- 7) vrijeme kad može i uslove pod kojima igrač u igri klađenja može odustati od izvršene uplate,
- 8) minimalnu visinu uplate i maksimalni iznos dobitka po jednom uplaćenom listiću, odnos uplata/dobitak tokom igre i način izvještavanja o tome,
- 9) postupak u slučaju otkazivanja ili odgode događaja koji je predmet ponude klađenja,
- 10) opis uplatnog listića,
- 11) način i rok isplate novčanih dobitaka koji mora iznositi najmanje 30 dana od dana objavljivanja konačnog izvještaja o rezultatu događaja,
- 12) informaciju o visini poreza na eventualne dobitke kao i načinu obustave i naplate istog
- 13) način upoznavanja igrača s pravilima klađenja,
- 14) uslove pod kojima priređivač može određenim licima privremeno ili stalno zabraniti ili ograničiti primanje uplata za klađenje,
- 15) odredbu o zabrani pristupa primanja uplata klađenja za lica mlađa od 18 godina.

Pravila igre klađenja primjenjuju se nakon dobivene saglasnosti Ministarstva i ne mogu se mijenjati u toku trajanja igre koju su igrači započeli nakon uplate iznosa za učestvovanje, te se igra do završetka odvija po istim pravilima.

Član 87.

Priredivači iz člana 77. stav 1. tačka 2. ovog zakona moraju imati odobrenje Ministarstva za priređivanje kladioničkih igara putem SMS -a.

Za izdavanje odobrenja iz stava 1. ovog člana, potrebno je dostaviti Ugovor sa telekom operaterom.

Član 88.

Čuvanje, registrovanje i evidentiranje podataka o primljenim uplatama za klađenje vrši se na softveru iz člana 83. ovog zakona.

Priredivač mora čuvati sve dobitne tikete neoštećene, sa serijskim brojem najmanje godinu dana, izuzev one za koje je pokrenut sudski spor.

Član 89.

Priredivač kladioničkih igara na sreću može trajno ili privremeno zabraniti učestvovanje u igrama na sreću na svim uplatnim mjestima licima za koje se utvrdi da krše pravila klađenja kao i licima koja u prostor uplatnog mjesta unesu vatreno oružje.

Član 90.

Na području Federacije BiH zabranjuju se klađenja koja su u suprotnosti sa odredbama ovog zakona, dobrim poslovnim običajima i općim moralnim načelima.

Zabranjuje se primanje uplata za klađenje licima mlađim od 18 godina.

Zabranjuje se primanja uplata klađenja na političke rezultate.

Uplatno mjesto za primanje uplata klađenja ne smije se nalaziti u radijusu od 100 m zračne linije od vjerskih, obrazovnih i kulturnih ustanova i objekata.

Član 91.

Odobrenje za priređivanje kladioničkih igara

Igre na sreću klađenja priređuju se na osnovu odobrenja Ministarstva koje se izdaje na period od dvije godine, sa mogućnošću ponovnog produženja. Odobrenje se može produžiti i oduzeti pod uslovima propisanim ovim zakonom.

Za dodjelu i oduzimanje odobrenja za priređivanje igara na sreću klađenja primjenjuju se odredbe čl. 9. do 14. ovog zakona.

Uz zahtjev za izdavanje odobrenja za priređivanje kladioničkih igara prilažu se:

- 1) podaci o firmi i sjedištu pravnog lica,
- 2) dokaz o uplati naknade za izdavanje odobrenja,
- 3) potvrdu banke o izvršenoj provjeri porijekla sredstava uplaćenih za kupovinu vlasničkog udjela, za polog sredstava namjenskog depozita iz člana 92. ovog zakona i sredstava uplaćenih po osnovu naknade iz člana 89. ovog zakona,
- 4) garanciju banke ili potvrdu o pologu namjenskog depozita u skladu sa članom 92. ovog zakona,
- 5) dokaz o registraciji pravnog lica,
- 6) osnivački akt pravnog lica,
- 7) poslovni plan pravnog lica,
- 8) dokaz o uplaćenom osnovnom kapitalu,
- 9) za prostore u kojem se nalaze uplatna mjesta ili terminali za klađenje, dokaz da je priređivač vlasnik prostora odnosno terminala ili dokaz o pravu korištenja prostora (po osnovu zakupa) i da se prostor ne nalazi u objektu kolektivnog stanovanja, da se isti ne nalazi u radijusu od 100 m od vjerskih, obrazovnih i kulturnih ustanova i objekata, za što posjeduje Izvod iz katastarskog plana sa podacima o udaljenosti izdat od strane nadležne općinske službe,
- 10) za opremu koja je neophodna za priređivanje kladioničkih igara, dokaz da je priređivač vlasnik,
- 11) dokaz da osnivači i ovlaštene osobe nisu osuđivane za krivična djela protiv privrede i platnog prometa i da se protiv njih za ta djela ne vodi krivični postupak,
- 12) dokaz da ima najmanje pet uplatnih mjesta,
- 13) pravila klađenja,
- 14) ovjerenu izjavu o ispunjenosti prostornih i tehničkih uslova,
- 15) dokaz o izmirenim poreznim obavezama (uvjerenje/potvrda izdata od strane Porezne uprave Federacije Bosne i Hercegovine i Uprave za indirektno oporezivanje Bosne i Hercegovine),
- 16) dokaz o ranijem iskustvu, preporuke i odobrenja koja je posjedovao (ako postoji),
- 17) ovjerenu izjavu priređivača datu pod punom materijalnom i krivičnom odgovornošću da mu ranije nije bilo oduzeto odobrenje u zemlji ili u inostranstvu, i da nije osuđen za krivično djelo utaje poreza,
- 18) dokaz o izmirenim poreznim obavezama osnivača, ukoliko je pravno lice novi pravni subjekt.

Član 92.

Priređivač je dužan za otvaranje svakog novog uplatnog mjesta ili za instaliranje samoposlužnog terminala za klađenje pribaviti odobrenje Ministarstva.

Uz zahtjev za izdavanje odobrenja iz stava 1. ovog člana priređivač prilaže sljedeće:

- 1) dokaz o vlasništvu ili pravu korištenja prostora (po osnovu zakupa),
- 2) ovjerenu izjavu o ispunjenosti prostornih i tehničkih uslova za priređivanje kladioničkih igara na sreću,
- 3) dokaz o uplaćenju naknadi iz člana 92. ovog zakona,
- 4) dokaz iz člana 91. stav 3. tačka 8. ovog zakona.

Član 93.

Naknade

Za izdavanje odobrenja za priređivanje kladioničkih igara na sreću priređivač iz člana 77. stav 1. tačka 2. ovog zakona plaća naknadu u iznosu od 150.000,00 KM.

Naknada za produženje važenja odobrenja iznosi 50.000,00 KM.

Za izdavanje odobrenja za otvaranje svakog novog uplatnog mjesta i preseljenje uplatnog mjesta na novu lokaciju, priređivač iz člana 77. stav 1. tačka 2. ovog zakona plaća naknadu u iznosu od 10.000,00 KM.

Dokaz o uplati naknade iz st. 1.- 3. ovog člana dostavlja se prilikom podnošenja zahtjeva za izdavanje odnosno produženje odobrenja.

Član 94.

Osim naknada iz člana 93. ovog zakona, priređivač iz člana 77 stav 1. tačka 2. ovog zakona ima obavezu plaćanja sljedećih naknada:

- 1) za svaki instalirani samoposlužni terminal 100,00 KM mjesečno,
- 2) za svaki postavljeni uređaj za priređivanje klađenja koji koristi sistem RNG iz člana 79. stav 1. ovog zakona 200,00 KM mjesečno.

Naknade iz stava 1. ovog člana priređivači iz člana 77 stav 1. tačka 2. ovog zakona plaćaju se za prethodni mjesec, najkasnije do 10-og u tekućem mjesecu za prethodni mjesec, računajući od dana dobivanja odobrenja za instaliranja uređaja.

Priređivači su dužni prilikom svake uplate, da na ime naknade za priređivanje igara na sreću klađenja, na teret igrača obustave 5% od svake pojedinačne uplate igrača.

Sredstva obustavljena na ime naknade iz stava 3. ovog člana, u iznosu od 5% od osnovice koju čini zbir svih pojedinačnih uplata koje u toku mjeseca uplaćuju igrači na uplatnim mjestima putem terminala, samoposlužnih terminala i putem SMS-a, prema pravilima igre odobrenim od Ministarstva, priređivači su dužni uplatiti u korist budžeta Federacije BiH.

Naknada iz stava 4. ovog člana plaća se za prethodni mjesec, najkasnije do 10-og u mjesecu za prethodni mjesec.

Zabranjen je obračun i naplata bilo koje vrste manipulativnih troškova prilikom zaprimanja uplata igrača na uplatnim mjestima i terminalima.

Član 95

Porez na dobitke od igara klađenja

Porez na dobitke ostvarene u posebnim igrama na sreću – klađenja, obračunava se i naplaćuje pri isplati svakog pojedinačno ostvarenog dobitka, a obračun i uplatu obavlja priređivač igara na sreću klađenja.

Osnovicu za obračun poreza na dobitak iz stava 1. ovog člana čini novčani iznos svakog pojedinačno ostvarenog dobitka.

Porez na dobitke plaća se po stopi od 10% na dobitke do 10.000,00 KM, a po stopi od 15% na dobitke iznad 10.000,00 KM.

Član 96.

Priređivač koji podnosi zahtjev za izdavanje odobrenje za priređivanje klađenja dužan je da osigura osnovni kapital u vrijednosti od 1.000.000,00 KM.

Radi osiguranja isplate dobitaka igračima i podmirenja obaveza po osnovu uplate javnih prihoda, za cijeli period važenja odobrenja iz člana 91. stav 1., priređivači iz člana 77. stav 1. tačka 2. ovog zakona moraju imati činidbenu garanciju banke sa klauzulom „bez prigovora naplativa na prvi poziv“ u visini 600.000,00 KM izdatu od banke sa sjedištem u Federaciji ili namjenski depozit u istom iznosu.

Sredstva osiguranja iz garancije i namjenskog depozita iz stava 2. ovog člana imaju karakter osiguranja isplate dobitaka i obaveza po osnovu uplate javnih prihoda, a koriste se kad su iscrpljena sva ostala sredstva kojima raspolaže priređivač. Ako se iznos ovih sredstava smanji, priređivač prestaje s radom.

Ako priređivač u roku od 30 dana od dana kada su sredstva garancije i depozita smanjena, ista ne popuni do punog iznosa sredstava, ukida se odobrenje za priređivanje igre na sreću klađenja, uz prethodno namirenje svih obaveza prema Federaciji kroz pljenidbu sredstava ili realizaciju bankarske garancije.

U slučaju smanjenja iznosa sredstava namjenskog depozita iz stava 2. ovog člana banka koja je izdala garanciju odnosno kod koje je položen namjenski depozit priređivača, dužna je o tome bez odlaganja obavijestiti Ministarstvo.

3. Igre na sreću na automatima

Član 97.

Igre na sreću automatima i pravo priređivanja

Igre na sreću na automatima mogu priređivati:

- 1) Lutrija BiH pod uslovima utvrđenim ovim zakonom,
- 2) Privredna društva sa sjedištem na teritoriji Federacije, koja se upisuju u sudski registar za obavljanje djelatnosti igara na sreću na automatima, na osnovu ovog zakona i odobrenja Ministarstva.

Igre na sreću na automatima mogu se pod uslovima propisanim ovim zakonom, priređivati i sezonski u neprekidnom razdoblju od najmanje četiri do najviše šest mjeseci u jednoj kalendarskoj godini, i to najviše u dva automat kluba.

Član 98.

Sistem automata

Sistem automata podrazumijeva telekomunikacijsko povezivanje većeg broja automata za igre na sreću u cilju formiranja jedinstvenog jack-pota s istim i istovremenim šansama svih učesnika u igri.

Lutrija BiH kao isključivi priređivač igre na sistemu automata, ima pravo uvezati maksimalno 1.500 aparata.

Lutrija BiH dužna je osigurati otvorenu on-line vezu sa Poreznom upravom s ciljem trenutnog i kontinuiranog uvida nadležnog organa u visinu ostvarenog prometa i povlačenja jack-pota. Telekomunikacijske usluge idu na teret Lutrije BiH.

Automati uvezani u sistem automata moraju ispunjavati uslove iz člana 102. stav 2. ovog zakona.

Visinu jackpota i procent izdvajanja za isti utvrđuje priređivač svojom odlukom.

Vrstu i performanse automata će utvrditi Vlada Federacije na prijedlog Ministarstva.

Član 99.

Porez na dobitke po osnovu jedinstvenog jack-pota

Porez na dobitak po osnovu jedinstvenog jack-pota ostvaren na sistemu automata, obustavlja se, obračunava i naplaćuje pri isplati svakog pojedinačno ostvarenog dobitka, a obustavu, obračun i uplatu obavlja Lutrija BiH.

Osnovicu za obračun poreza na dobitak iz stava 1. ovog člana čini novčani iznos svakog pojedinačno ostvarenog dobitka jack-pota.

Porez na dobitke iz stava 1. ovog člana plaća se po stopi od 10%.

Član 100.

Vrste igara na sreću u automat klubovima

Priredivači iz člana 97. zakona su dužni Ministarstvu dostaviti podatke o vrstama igara koje se priređuju na automatima u posebnim automat klubovima.

Član 101.

Prostorni, tehnički i drugi uslovi za priređivanje igara na sreću na automatima

Igre na sreću na automatima priređuju se u automat klubovima kao posebno uređenim prostorima sa vlastitim ulazom ili u prostorima koji se smatraju zasebnom cjelinom, a za koje priredivač posjeduje dokaz o vlasništvu ili pravu korištenja (po osnovu zakupa, itd.).

Automat klub mora imati najmanje 25 automata za igre na sreću, a cjelokupna površina automat kluba ne može biti manja od 50 m², izuzev objekata u kojima se priređuju i klasične igre na sreću.

Automat klub mora imati blagajnu i sef za čuvanje novca i drugih vrijednosti.

U prostoru automat kluba mora biti zabranjen ulazak licima mlađim od 18 godina.

Bliže prostorne i tehničke uslove za priređivanje igara na sreću na automatima propisuje Ministar.

Član 102.

Automati za priređivanje igara na sreću moraju biti tehnički ispravni.

Automati za igre na sreću moraju biti tako konstruirani, odnosno podešeni, da na ukupan broj programiranih kombinacija isplaćuju igračima najmanje 80 % od vrijednosti uplata svih igara na automatima (TOTAL IN + BET).

Dobitak ili gubitak u igrama na sreću na automatima određuje se elektronskim programom, putem generatora slučajnih brojeva.

Generator slučajnih brojeva mora ispunjavati uslove da je slučajni broj statistički i nezavisan i da slučajni broj ne može biti predviđen.

Član 103.

Automat klub mora imati Centralni računarski sistem (Server) za on-line nadzor koji mora biti povezan sa informacionim sistemom Porezne uprave i koji mora posebno osigurati centralno umrežavanje svih automata jednog priređivača koje omogućava kontrolu podataka od Porezne uprave, za sve priključene automate.

Član 104.

Automat za igre na sreću koji se stavlja u upotrebu u Federaciji mora posjedovati tehnički pasoš koji se izdaje od strane proizvođača, certifikat o usklađenosti tipa uređaja i programa za igru pribavljen od ovlaštenog i za certifikaciju nadležnog pravnog lica koje je akreditovano prema međunarodnim standardima.

Detaljnije uslove o načinu stavljanja automata u upotrebu, certificiranju automata, tehničkom pregledu automata, dobivanju odobrenja za obavljanje certificiranja automata i obavljanje tehničkog pregleda, propisuje Ministar.

Prije stavljanja u upotrebu automata za igre na sreću obavezan je njegov tehnički pregled koji vrši pravno lice koje posjeduje odobrenje Ministarstva za obavljanje ove djelatnosti. O izvršenom tehničkom pregledu, ovlašteno pravno lice izdaje uvjerenje.

Posebne uslove o tehničkoj ispravnosti automata, način obavljanja tehničkog pregleda i uslova koja moraju da ispunjavaju pravna lica ovlaštena za obavljanje tehničkog pregleda, propisat će Ministar.

Tehnički pregled ne mogu obavljati pravna lica koja su: proizvođači automata za igre na sreću, za zabavne igre ili stolova za igre na sreću; priređivači igara na sreću; lica koja se bave iznajmljivanjem automata za igre na sreću, stolova ili automata za zabavu; dostavljači, serviseri ili ovlašteni zastupnici navedenih lica.

Član 105.

Priređivač prilikom stavljanja automata u upotrebu, mora na vidnom mjestu istaknuti naljepnicu za označavanje i registraciju, sa podacima o vrsti uređaja, lokaciji i serijskom broju naljepnice i priređivaču igara.

Naljepnicu iz stava 1. ovog člana izdaje Porezna uprava, o čemu vodi evidenciju.

Porezna uprava izdaje naljepnicu uz posebnu naknadu od 10,00 KM.

Naljepnica prestaje da važi nakon godinu dana od izdavanja.

Sadržaj naljepnice i način vođenja evidencije o izdatim naljepnicama propisuje Ministar.

Svaki automat za igre na sreću koji se prvi put stavlja u upotrebu ne smije biti stariji od godinu dana računajući do dana podnošenja zahtjeva za izdavanje odobrenja.

Priredivač je dužan prijaviti Ministarstvu i Poreznoj upravi najkasnije sedam dana prije svakog stavljanja u upotrebu, povlačenje iz upotrebe kao i premještanje automata za igre na sreću.

Član 106.

Pravila automat klubova

Priredivač mora na vidljivom mjestu u automat klubu istaknuti pravila automat kluba koja su u saglasnosti sa dobrim poslovnim običajima.

Pravila automat kluba sadrže:

- 1) vrste posebnih igara na sreću koje se priređuju u automat klubu
- 2) uslove kada je pojedinim igračima zabranjen pristup u klub ili učešće u igrama na sreću na automatima
- 3) radno vrijeme automat kluba.

Priredivači iz člana 97. stav 1. tačka 2. su dužni donijeti pravila za svaku igru na sreću, na koja saglasnost daje Ministarstvo.

Priredivač igara na sreću u automat klubovima dužan je osigurati sistem nadzora koji će vjerodostojno pratiti, bilježiti i pohranjivati podatke o primljenim uplatama i isplatama te osigurati nepromjenjivost primljenih podataka.

Zabranjeno je držati automate za igre na sreću, automate za zabavu ili stolove za igru u prostorijama za koje ne postoji odobrenje za priređivanje igara na sreću putem automata.

U automat klubu nije dopušteno unošenje tehničkih pomagala prikladnih za pribavljanje prednosti u igri.

Član 107.

Odobrenje za priređivanje igara na sreću u automat klubovima

Igre na sreću na automatima priređuju se na osnovu odobrenja Ministarstva koje se izdaje na period od dvije godine, sa mogućnošću ponovnog produženja. Odobrenje se može produžiti i oduzeti pod uslovima propisanim ovim zakonom.

Za dodjelu i oduzimanje odobrenja za priređivanje igara na sreću na automatima primjenjuju se odredbe čl. 9. do 14. ovog zakona.

Za svaki novi automat klub koji otvara nakon dobivanja odobrenja iz stava 1. ovog člana, priredivač je dužan pribaviti odobrenje Ministarstva.

Član 108.

Uz zahtjev za dobivanje odobrenja iz člana 107. stav 1. ovog zakona, prilaže se:

- 1) rješenje o registraciji pravnog lica
- 2) podaci o nazivu firme i sjedištu pravnog lica,
- 3) dokaz o uplati osnovnog kapitala iz člana 109. ovog zakona,
- 4) dokaz o uplati naknade za izdavanje odobrenja,
- 5) garanciju banke ili potvrdu o pologu namjenskog depozita u skladu sa članom 110. ovog zakona,
- 6) potvrdu banke o izvršenoj provjeri porijekla sredstava uplaćenih za kupovinu vlasničkog udjela, za polog sredstava namjenskog depozita iz člana 112. ovog zakona i sredstava uplaćenih po osnovu naknade iz člana 110. i 111. ovog zakona,
- 7) osnivački akt pravnog lica,
- 8) pravila igara na sreću na automatima,
- 9) dokaz o vlasništvu automata,
- 10) dokaz o vlasništvu ili pravu korištenja prostora u kome će se priređivati igre na sreću na automatima i da se prostor ne nalazi u objektu kolektivnog stanovanja, da se isti ne nalazi u radijusu od 100 m od vjerskih, obrazovnih i kulturnih ustanova i objekata, za što posjeduje Izvod iz katastarskog plana sa podacima o udaljenosti izdat od strane nadležne općinske službe,
- 11) izjavu o ispunjenosti prostornih i tehničkih uslova za taj automat klub,
- 12) uvjerenje o tehničkom pregledu automata iz člana 104. stav 3. ovog zakona,
- 13) podaci o vrsti i broju kao i detaljni podaci za identifikaciju svih automata za igre kao i ostalih uređaja za igre na sreću koji su predviđeni za postavljanje u automat klub,
- 14) dokaz o izmirenim poreznim obavezama (uvjerenje/potvrda izdata od strane Porezne uprave Federacije Bosne i Hercegovine i Uprave za indirektno oporezivanje Bosne i Hercegovine),
- 15) ovjerenu izjavu priređivača datu pod punom materijalnom i krivičnom odgovornošću da mu ranije nije bilo oduzeto odobrenje u zemlji ili u inostranstvu i da nije osuđen za krivično djelo utaje poreza,
- 16) dokaz o izmirenim poreznim obavezama osnivača, ukoliko je pravno lice novi pravni subjekt.

Član 109.

Osnivački kapital

Odobrenje za priređivanje igara na sreću na automatima može dobiti pravno lice koje, osim ispunjenja uslova propisanih ovim zakonom, ima osnovni kapital koji ne može biti manji od 500.000,00 KM.

Član 110.

Za izdavanje odobrenja za priređivanje igara na sreću na automatima prilikom otvaranja prvog posebnog automat kluba priređivač iz člana 97. stav 1. tačka 2. plaća naknadu u iznosu od 150.000,00 KM.

Za otvaranje svakog novog posebnog automat kluba plaća se naknada u iznosu 100.000,00 KM.

Naknada za produženje važenja odobrenja iznosi 20.000,00 KM.

Dokaz o uplati naknade iz st. 1. i 2. ovog člana dostavlja se prilikom podnošenja zahtjeva za izdavanje odnosno produženje odobrenja.

Član 111.

Osim naknada iz člana 110. ovog zakona, priređivači iz člana 97. stav 1. tačka 2. ovog zakona plaćaju naknade za svaki postavljeni automat 1.000,00 KM po automatu.

Priređivač je dužan u korist budžeta Federacije BiH uplatiti i mjesečnu naknadu u iznosu od 5% od osnovice iz stava 3. ovog člana.

Osnovicu za obračun mjesečne naknade čini zbir dnevnih obračuna svih automata.

Osnovica za dnevni obračun pojedinog automata za igre na sreću utvrđuje se tako da se iznos svih uplata umanji za iznos isplaćenih dobitaka igračima, a razlika predstavlja dnevni obračun za pojedini automat za igre na sreću. Automati s više sjedećih mjesta smatraju se jednim automatom i za njih se vodi poseban dnevni obračun.

Naknada iz stava 2. ovog člana plaća se za prethodni mjesec, najkasnije do 10-og u mjesecu za prethodni mjesec.

Naknade iz stava 1. ovog člana plaćaju se prilikom podnošenja zahtjeva za izdavanje odobrenja iz člana 107. stav 1. ovog zakona, odnosno podnošenja zahtjeva za odobravanje instaliranja svakog novog automata za igre na sreću.

Član 112.

Radi osiguranja isplate dobitaka igračima i podmirenja obaveza po osnovu uplate javnih prihoda, za cijeli period važenja odobrenja iz člana 107. stav 1., priređivači iz člana 97. stav 1. tačka 2. moraju imati činidbenu garanciju banke sa klauzulom „bez prigovora naplativa na prvi poziv“ izdatu od banke sa sjedištem u Federaciji ili namjenski depozit u iznosu od 1.000 KM po automatu.

Sredstva osiguranja iz garancije i namjenskog depozita iz stava 1. ovog člana imaju karakter osiguranja isplate dobitaka i obaveza po osnovu uplate javnih prihoda, a koriste se kad su iscrpljena sva ostala sredstva kojima raspolaže priređivač. Ako se iznos ovih sredstava smanji, priređivač prestaje s radom.

Ako priređivač u roku od 30 dana od dana kada su sredstva garancije i depozita smanjena, ista ne popuni do punog iznosa sredstava, ukida se odobrenje za priređivanje igre na sreću na automatima, uz prethodno namirenje svih obaveza prema Federaciji kroz pljenidbu sredstava ili realizaciju bankarske garancije.

U slučaju smanjenja iznosa sredstava namjenskog depozita iz stava 2. ovog člana banka koja je izdala garanciju odnosno kod koje je položen namjenski depozit priređivača, dužna je o tome bez odlaganja obavijestiti Ministarstvo.

Član 113.

Dostavljanje evidencija

Evidenciju o uplatama mjesečnih naknada sa dokazom o uplati mjesečne naknade za priređivanje svih igara na sreću iz člana 4. ovog zakona, svi priređivači su dužni na propisanim obrascima dostaviti nadležnom uredu Porezne uprave najkasnije do dvadesetog dana u tekućem mjesecu za prethodni mjesec.

Sadržaj obavezne evidencije i obrazaca za uplate naknada iz stava 1. ovog člana te način i oblik dostavljanja evidencija, kao i način i oblik drugih obrazaca koje je priređivač dužan voditi propisat će Ministar.

V. PRIREĐIVANJE IGARA NA SREĆU PUTEM INTERNETA

Član 114.

Pravo priređivanja i zaprimanja uplata putem interneta

Pravo zaprimanja uplata putem interneta za učestvovanje u klasičnim igrama na sreću iz člana 4. stav 2. ovog zakona, isključivo je pravo Lutrije BiH.

Pravo priređivanja putem interneta igara na sreću klađenja iz člana 4. stav 3. tačka 2. ovog zakona, pored Lutrije BiH, na osnovu posebnog odobrenja Ministarstva imaju privredna društva koja posjeduju odobrenje za priređivanje igara na sreću klađenja iz člana 77. stav 1. tačka 2. ovog zakona.

Zabranjeno je putem interneta priređivanje klađenja iz člana 79. ovog zakona.

Član 115.

Prostorni, tehnički i drugi uslovi za priređivanje igara putem interneta

Ministar će propisati tehničke uslove, procedure, postupak registracije i identifikacije igrača, uslove programske podrške (softvera) i opreme, sigurnosna načela, uslove nadzora, načela odgovornog priređivanja za priređivanje internet igara na sreću.

Priređivači iz člana 114., dužni su svoj sistem priređivanja uskladiti sa tehničkim uslovima koje propisuje Ministar.

Priređivač igara na sreću putem interneta mora da osigura funkcionalnu informatičku opremu „hardware“ i „software“ (u daljem tekstu: „hardver i softver“) na teritoriji Federacije koja je neprekidno povezana sa informacionim sistemom Porezne uprave, radi nadzora i kontrole finansijskog poslovanja.

Priređivač igara na sreću putem interneta mora imati stručan i specijaliziran kadar.

Član 116.

Priređivač igra na sreću putem interneta mora imati web stranicu na kojem moraju biti sljedeći podaci:

- 1) naziv pravnog lica – priređivača,
- 2) sjedište priređivača,
- 3) broj odobrenja za priređivanje igara na sreću putem interneta i datum izdavanja,
- 4) popis igara klađenja za koje je priređivač dobio odobrenje od Ministarstva,
- 5) pravila i procedure igara i igranja,
- 6) obavijest o zabrani učestvovanja lica mlađih od 18 godina,
- 7) upozorenje o tome da igre na sreću mogu uzrokovati ovisnost, te uputstvo o internetskoj stranici na kojoj se mogu pronaći informacije o stručnoj pomoći u vezi s prevencijom ovisnosti o igrama na sreću,
- 8) izjava o mjerama zaštite ličnih podataka igrača,
- 9) linkove do zakonskih tekstova i procedura za Internet igre na sreću.

Član 117.

Priređivač igara na sreću putem interneta registrovat će igrača samo ako dobije potpuno popunjenu aplikaciju za registraciju.

Priređivač igara na sreću putem interneta zabranit će učestvovanje u igri pojedinom igraču ukoliko nije registrovan kod priređivača.

Priređivač igara na sreću koje se priređuju putem interneta mora osigurati sigurnu, odnosno anonimnu on-line listu svih učesnika u igri.

Svaki igrač može da se registriira samo sa jednim nalogom kod priređivača igara na sreću putem Interneta.

Priređivač igara na sreću putem interneta mora izvršiti identifikaciju igrača provjerom tačnosti podataka igrača i utvrditi njegovu punoljetnost provjerom podataka putem Porezne uprave ili CIPS-a.

Član 118.

Priređivač internet igara na sreću kontinuirano Poreznoj upravi mora obezbjediti pristup najmanje sljedećim podacima:

- 1) korisničko ime registrovanih igrača sa virtuelnim računom igrača,
- 2) broj virtuelnog računa igrača (posebnog igračevog računa putem kojeg on učestvuje u internet igrama na sreću),
- 3) stanje virtuelnog računa igrača,
- 4) prikaz svih transakcija igrača ostvarenih učešćem u igri.

Član 119.

Priređivač internet igara na sreću dužan je imati tehničku i funkcionalnu opremu na teritoriji Federacije BiH, odnosno hardver i softver, preko kojih igrači učestvuju u igrama na sreću putem interneta.

Softver iz stava 1. ovog člana obavezno izrađuje pravno lice koje je registrovano u skladu sa zakonom kojim se uređuje oblast izrade i stavljanje u promet softvera i certifikovan je od ovlaštene laboratorije za certifikaciju.

Softver iz stava 1. ovog člana može biti u vlasništvu priređivača ili priređivač posjeduje pravo korištenja softvera u svrhu priređivanja internet igara na sreću.

Hardver iz stava 1. ovog člana obavezno je u vlasništvu priređivača internet igara na sreću.

Priređivač igara na sreću putem interneta mora dostaviti Poreznoj upravi i Ministarstvu pravila i procedure koje se odnose na igre na sreću koje priređuje putem interneta i dokaz o uplati naknade koju naplaćuje od igrača prilikom kupovine tiketa ili uplate za kladioničke igre.

Član 120.

Uplate iznosa kredita na virtualne račune igrača za učešće u klasičnim igrama na sreću i igrama klađenja putem interneta koje priređuje Lutrija BiH, kao i isplate ostvarenih dobitaka, mogu se vršiti isključivo na uplatnim mjestima Lutrije BiH.

Uplate iznosa kredita za učešće u igrama klađenja putem interneta koje priređuju priređivači iz člana 77. stav 1. tačka 2. ovog zakona, kao i isplate ostvarenih dobitaka, mogu se vršiti isključivo na uplatnim mjestima priređivača za koje je u skladu sa ovim zakonom izdato odobrenje.

Priređivač igara na sreću putem interneta pri svakoj uplati i isplati mora da provjeri i potvrdi registraciju igrača, potvrdi igru igrača, provjeri sigurnost i interne procedure u vezi sa računom igrača i osigura da se pravila koja se odnose na igru primjenjuju.

Član 121.

Odobrenje za priređivanje igara na sreću putem interneta

Igre na sreću klađenja putem interneta, priređivači iz člana 77. stav 1. tačka 2. ovog zakona priređuju na osnovu posebnog odobrenja Ministarstva koje će važiti do istog datuma kao i odobrenje izdato u skladu sa članom 91. stav 1. ovog zakona. Odobrenje se može produžiti i oduzeti pod uslovima propisanim ovim zakonom.

Prilikom izdavanja odobrenja iz stava 1. ovog člana, Ministarstvo odlučuje i o davanju saglasnosti na pravila i procedure iz člana 119. ovog zakona.

Uz zahtjev za izdavanje odobrenja za priređivanje igre na sreću putem interneta prilažu se:

- 1) podaci o firmi i sjedištu pravnog lica,
- 2) rješenje o sudskoj registraciji i ranije izdato važeće odobrenje Ministarstva,
- 3) dokaz o vlasništvu opreme koja se koristi za priređivanje internet igara na sreću,
- 4) pravila igre,
- 5) serijski broj servera putem kojeg se priređuju internet igre na sreću i dokaz o mjestu gdje je server smješten,
- 6) ovjerenu izjavu proizvođača softvera da nema skrivene funkcije koje bi mogle uticati na tačnost podataka,
- 7) dokaz o izmirenim poreznim obavezama (uvjerenje/potvrda izdata od strane Porezne uprave Federacije Bosne i Hercegovine i Uprave za indirektno oporezivanje Bosne i Hercegovine),
- 8) dokaz o ranijem iskustvu, preporuke i ranija odobrenja koje je posjedovao,
- 9) izjavu priređivača da mu ranije nije bilo oduzeto odobrenje u zemlji ili u inostranstvu i da nije osuđen za krivično djelo utaje poreza i doprinosa,
- 10) garanciju banke izdatu u skladu sa članom 123. stav 2. ovog zakona.

Član 122.

Naknade

Za izdavanje odobrenja za priređivanje igara na sreću putem interneta priređivači iz člana 114. st. 2. ovog zakona plaćaju naknadu iznosu od 100.000,00 KM.

Naknada za produženje važenja odobrenja iznosi 50.000,00 KM.

Dokaz o uplati naknade iz st. 1. i 2. ovog člana dostavlja se prilikom podnošenja zahtjeva za izdavanje odnosno produženje odobrenja.

Član 123.

Priredivači iz člana 114. stav 2. ovog zakona, igara na sreću putem interneta moraju imati osnovni kapital u vrijednosti od 1.500.000 KM.

Radi osiguranja isplate dobitaka igračima i podmirenja obaveza po osnovu uplate javnih prihoda, za cijeli period važenja odobrenja za priređivanje igara na sreću putem interneta, priredivači iz člana 114. stav 2. ovog zakona moraju imati činidbenu garanciju banke sa klauzulom „bez prigovora naplativa na prvi poziv“ u visini 800.000,00 KM izdatu od banke sa sjedištem u Federaciji ili namjenski depozit u istom iznosu.

Sredstva osiguranja iz garancije i namjenskog depozita iz stava 2. ovog člana imaju karakter osiguranja isplate dobitaka i obaveza po osnovu uplate javnih prihoda, a koriste se kad su iscrpljena sva ostala sredstva kojima raspolaže priredivač. Ako se iznos ovih sredstava smanji, priredivač prestaje s radom.

Ako priredivač u roku od 30 dana od dana kada su sredstva garancije i depozita smanjena, ista ne popuni do punog iznosa sredstava, ukida se odobrenje za priređivanje igre na sreću putem interneta, uz prethodno namirenje svih obaveza prema Federaciji kroz pljenidbu sredstava ili realizaciju bankarske garancije.

U slučaju smanjenja iznosa sredstava namjenskog depozita iz stava 2. ovog člana banka koja je izdala garanciju odnosno kod koje je položen namjenski depozit priredivača, dužna je o tome bez odlaganja obavijestiti Ministarstvo.

Član 124.

Lutrija BiH plaća mjesečnu naknadu u iznosu od 10% od ukupnog prometa ostvarenog zaprimanjem uplata za priređivanje klasičnih igara na sreću putem interneta.

Priredivači igara na sreću klađenja putem interneta, su dužni prilikom svake uplate za učestvovanje u igri, da na ime naknade za priređivanje na teret igrača obustave 5% od svake pojedinačne uplate igrača.

Sredstva obustavljena na ime naknade iz stava 1. ovog člana, u iznosu od 5% od osnovice koju čini zbir svih pojedinačnih uplata koje u toku mjeseca uplaćuju igrači na uplatnim mjestima, priredivači su dužni uplatiti u korist budžeta Federacije BiH.

Naknada iz stava 1. ovog člana plaća se za prethodni mjesec, najkasnije do 10-og u mjesecu za prethodni mjesec.

VI. POSEBNE OBAVEZE PRIREĐIVAČA

Član 125.

Sprečavanje pranja novca i finansiranja terorizma

Priredivači igara na sreću u smislu ovoga zakona, dužni su u svom poslovanju postupati u skladu s propisima kojima se uređuje sprečavanje pranja novca i finansiranja terorizma i drugih protivzakonitih aktivnosti, a posebno u slučaju sumnjivih transakcija.

Član 126.

Tajnost podataka o igračima i njihovim dobitcima

Priredivač i zaposlenici priredivača dužni su čuvati u tajnosti podatke o igračima i njihovom učestvovanju u igri, uključujući i podatke o njihovim dobitcima i gubicima.

Obaveza čuvanja tajnosti nije povrijeđena u slučajevima u kojima u skladu sa odredbama poreznih propisa ne postoji obaveza čuvanja porezne tajne i u slučajevima kada je priredivač obavezan postupati u skladu sa propisima kojima se uređuje sprečavanje pranja novca i finansiranja terorizma.

Član 127.

Zabrana oglašavanja igara na sreću u štampanim i elektronskim medijima za mlade

Oglasi i reklame vezani uz igre na sreću ne smiju se objavljivati u radijskim i televizijskim emisijama za djecu i omladinu, niti u štampanom materijalu namijenjenom djeci i omladini.

Zabrana iz stava 1. ovoga člana odnosi se i na priredivača i izdavača.

VII. NADZOR

Član 128.

Nadzor nad provođenjem odredaba ovog zakona i podzakonskih akata donesenih na osnovu ovog zakona vrši Ministarstvo i Porezna uprava.

Porezna uprava vrši direktan nadzor nad priredivačima igara na sreću putem računarskog sistema za on-line nadzor koji je povezan sa Centralnim računarskim sistemom (serverom) priredivača.

Član 129.

Priređivači igara na sreću obavezni su osigurati uslove za svakodnevno obavljanje nadzora poslovanja od strane Porezne uprave.

Član 130.

U okviru nadzora iz člana 128. ovog zakona, osim poslova i ovlaštenja propisanih ovim zakonom, Porezna uprava vrši i poslove inspekcijskog nadzora.

Poslove inspekcijskog nadzora obavljaju ovlašteni službenici Porezne uprave (u daljem tekstu: inspektori).

U toku obavljanja poslova inspekcijskog nadzora, inspektori ostvaruju neposredan uvid u zakonitost rada, poslovanja i postupanja pravnih i fizičkih lica u pogledu pridržavanja zakona i drugih propisa, te preduzimaju upravne i druge mjere za koje su ovlašteni zakonom i drugim propisom.

Član 131.

Prilikom obavljanja poslova inspekcijskog nadzora, inspektor ima obaveze i ovlaštenje da:

- 1) prisustvuje potpisivanju otvaranja, obračunavanja i zatvaranja stolova i automata za igre na sreću u casinu, kao i dnevnom obračunu blagajne i drugim radnjama koje su neposredno ili posredno povezane sa radom casina, kladionica, automat klubova i tombola zatvorenog tipa
- 2) pregleda poslovne prostorije i sve postupke koji su vezani za priređivanje igara na sreću, naprave i pomagala za priređivanje igre na sreću, pregleda opće i pojedinačne akte, evidencije, knjigovodstvenu, poslovnu i drugu dokumentaciju koja je od značaja za vršenje nadzora odnosno utvrđivanje stanja
- 3) pregleda naprave za nadzor nad izvođenjem igara na sreću, audio i video naprave i pomagala,
- 4) utvrđuje identitet lica, kao i druge činjenice i okolnosti koje su od interesa za vršenje nadzora,
- 5) privremeno oduzme dokumente i predmete koji u daljnjem sudskom postupku mogu poslužiti kao dokaz, uz izdavanje potvrde o oduzimanju,
- 6) u slučaju postojanja sumnje na nelegalno priređivanje igara na sreću, naredi prinudno otvaranje objekta radi vršenja nadzora,
- 7) predlaže preventivne mjere u cilju sprečavanja povrede zakona i drugih propisa,
- 8) podnese izvještaj nadležnom organu za učinjeno krivično djelo ukoliko u toku inspekcijskog pregleda inspektor utvrdi da postoje elementi krivičnog djela kod priređivača,
- 9) vrši i druge radnje za koje je ovlašten na osnovu odredaba ovog zakona, drugog posebnog zakona ili propisa.

Član 132.

Svako zaposleno ili ovlašteno lice u pravnom licu nad kojim se vrši inspekcijski nadzor dužno je da omogući inspektoru nesmetan pristup u sve prostorije i uvid u svu dokumentaciju i evidencije, kao i da pruži sve neophodne informacije, odmah ili u roku koji mu je odredio inspektor, a kako bi se izvršio inspekcijski nadzor.

Lice iz stava 1. ovog člana dužno je na zahtjev inspektora privremeno obustaviti rad u objektu za vrijeme vršenja inspekcijskog pregleda ako ga inspektor ne bi na drugi način mogao izvršiti i utvrditi činjenično stanje.

Ako je inspektor pri vršenju inspekcijskog nadzora ometan ili onemogućen da ga izvrši, zatražit će poduzimanje mjera i radnji ovlaštenog službenog lica nadležnog ministarstva unutrašnjih poslova.

Član 133.

Inspektori pored redovnih inspekcija dužni su obaviti inspekciju i kada za to dobiju nalog Ministarstva, na osnovu prijave građana, privrednih društava i drugih organizacija i o svom postupanju obavijestiti podnosioca prijave, kao i u slučajevima postojanja osnovane sumnje u bilo kakvo kršenje ovog zakona i podzakonskih propisa donesenih na osnovu njega.

Inspektoru je zabranjeno da učestvuje u igrama na sreću koje se priređuju u casinu, na automatima i u kladionici.

Član 134.

Inspektor ima ovlaštenje i obavezu da naloži upravne i druge mjere za koje je ovlašten na osnovu odredaba ovog zakona, drugog posebnog zakona ili propisa.

Upravne i druge mjere iz stava 1. ovog člana inspektor nalaže donošenjem pisanog rješenja na osnovu činjeničnog stanja utvrđenog u zapisniku o inspekcijskom nadzoru.

Protiv rješenja iz stava 2. ovog člana, pravno i fizičko lice na koga se rješenje odnosi može izjaviti žalbu Ministarstvu u roku od osam dana od dana dostavljanja rješenja.

Rješenje po žalbi se mora donijeti u roku od 15 dana od dana prijema žalbe. Rješenje doneseno po žalbi je konačno i protiv njega se može pokrenuti upravni spor kod nadležnog suda.

Kada priređivač, koji u skladu sa ovim zakonom ima važeće odobrenje za priređivanje igara na sreću, ne postupi u skladu sa nalogom sadržanim u konačnom rješenju iz stava 2. ovog člana, inspektor će podnijeti prijedlog Ministarstvu za donošenje rješenja o oduzimanju odobrenja za priređivanje igara na sreću, nagradnog konkursa ili nagradne igre.

Na osnovu prijedloga iz stava 5. ovog člana Ministarstvo može donijeti rješenje o oduzimanju odobrenja, protiv kojeg žalba nije dozvoljena.

VIII. KAZNENE ODREDBE

Član 135.

Novčanom kaznom u iznosu od 5.000,00 do 30.000,00 KM kaznit će se za prekršaj pravno lice ako:

- 1) priređuje klasične igre na sreću suprotno odredbama ovog zakona (čl. 4. i 9.),
- 2) priređuje nagradnu igru suprotno odredbama ovog zakona (član 18.),
- 3) postupa suprotno zabranama propisanim ovim zakonom (član 20.),
- 4) obavi izvlačenje dobitaka bez prisustva ovlaštenog službenika Ministarstva (član 36.),
- 5) promijeni pravila pojedinog kola ili serije klasične igre na sreću nakon što je počela prodaja srećaka igre na sreću toga kola, odnosno serije ili ako bez odobrenja odgodi i javno ne objavi dan ili mjesto izvlačenja dobitaka (čl. 35. i 37.),
- 6) ne objavi javno izvještaj o rezultatima izvlačenja (čl.39),
- 7) ne utvrdi dobitke i ne isplaćuje ih u roku utvrđenom u pravilima igre (član 41.)
- 8) priredi igru na sreću – tombolu zatvorenog tipa suprotno ovom zakonu (čl. 50. i 51.),
- 9) stavlja u promet tombolske kartice koje nije izdala Porezna uprava (član 52.),
- 10) priredi igru na sreću u casinu suprotno odredbama ovog zakona (čl. 55. do 75.),
- 11) trajno ne osigura odgovarajuću kontrolu audio-video uređajima i drugim sličnim tehničkim sredstvima u casinima (član 61.),
- 12) se u prostoru casina, kladionice, tombole zatvorenog tipa ili objekta u kojem se priređuju igre na sreću putem automata nalazi lice mlađe od 18 godina (čl. 63., 90. i 101.),
- 13) priredi kladioničke igre suprotno ovom zakonu (čl. 76. do 96.),
- 14) pravila igre na sreću u casinu, na uplatnom mjestu kladionice ili u objektu u kojem se priređuju igre na sreću putem automata nisu igračima na raspolaganju (čl. 65., 85. i 106.),
- 15) priredi igre na sreću na automatima suprotno ovom zakonu (čl.97. do 112.),
- 16) kao ovlašteno lice za obavljanje tehničkog pregleda i postupi protivno odredbama ovog zakona (član 104.),
- 17) Ministarstvu ne prijavi u propisanom roku svaki automat za igre na sreću i stavi u upotrebu automate na kojima na vidnom mjestu nije istaknuta posebna naljepnica (član 105.),
- 18) ne dostavi evidenciju o uplatama mjesečnih naknada sa dokazom o uplati mjesečne naknade za priređivanje svih igara na sreću iz člana 4. stav 3. ovog zakona (član 113),
- 19) zaprima uplate i priređuje internet igre na sreću suprotno odredbama ovog zakona (čl. 114. do 123.),
- 20) ne ispunjava posebne obaveze utvrđene ovim zakonom (čl. 125. do 127.).

Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 1.500 do 10.000 KM.

Pored novčane kazne pravnom i fizičkom licu za učinjene prekršaje iz ovog člana, izreći će se i zaštitna mjera oduzimanja sredstava i predmeta koji su korišteni ili koji se mogu upotrijebiti za priređivanje igara na sreću, kao i zabrana obavljanja djelatnosti.

Član 136.

Novčanom kaznom u iznosu od 10.000,00 do 50.000,00 KM kaznit će se za prekršaj pravno lice ako:

- 1) zbog promjene vlasničke strukture priređivača ne podnese zahtjev Ministarstvu za odobravanje promjene vlasničke strukture (član 12.)
- 2) prilikom priređivanja igara na sreću klađenja ne osigura on-line vezu svih uplatno isplatnih mjesta sa serverom Porezne uprave (član 83.)
- 3) prilikom priređivanja igara na sreću klađenja putem interneta ne osigura funkcionalnu informatičku opremu hardver i softver na teritoriji Federacije koja će neprekidno biti povezana sa informacionim sistemom Porezne uprave (član 115.)
- 4) u automat klubu koji posjeduje odobrenje Ministarstva ne osigura Centralni računarski sistem (Server) za on-line nadzor i ne poveže isti sa informacionim sistemom Porezne uprave, na način koji osigurava centralno umrežavanje svih automata jednog priređivača koje radi kontrolu podataka od strane Porezne uprave (član 103.)
- 5) prilikom obavljanja nadzora ne omogući ovlaštenim organima pregled poslovne dokumentacije, poslovnih prostorija, pomagala, naprava ili onemogući nadzor cjelokupnog materijalno-finansijskog poslovanja ili na bilo koji drugi način onemogući vršenje inspekcijskog nadzora (član 120. i 121.)

Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 3.000 do 15.000 KM.

Član 137.

Novčanom kaznom u iznosu od 15.000,00 do 50.000,00 KM kaznit će se za prekršaj pravno lice ako:

- 1) mjesečnu naknadu za priređivanje klasičnih lutrijskih igara na sreću netačno obračuna ili ne uplati u propisanom roku (član 6.),
- 2) pri isplati dobitaka ne obračuna i ne uplati porez na dobitke (čl. 8., 19. i 95. i 99.),
- 3) mjesečnu naknadu za priređivanje posebnih igara na sreću i igara na sreću putem interneta, netačno obračuna ili ne uplati u propisanom roku (čl. 75., 94. 113. i 124.).

Član 138.

Novčanom kaznom u iznosu od 10.000,00 do 30.000,00 KM kaznit će se za prekršaj fizičko lice ako priređuje igre na sreću iz člana 4. ovog zakona.

Pored novčane kazne fizičkom licu za učinjene prekršaje iz stava 1. ovog člana izreći će se i zaštitna mjera oduzimanja svih sredstava i predmeta koji su korišteni ili koji se mogu upotrijebiti za priređivanje igara na sreću, kao i zabrana obavljanja djelatnosti priređivanja igara na sreću.

Član 139.

Novčanom kaznom u iznosu od 5.000,00 do 15.000,00 KM kaznit će se za prekršaj pravno lice (priređivač), ako njegovi članovi ili zaposleni ne budu poštovali obavezu čuvanja tajne o igračima i njihovim uplatama u igri (član 48. i 126.).

Za prekršaj iz stava 1. ovog člana, novčanom kaznom u iznosu od 1.500 do 5.000 KM kaznit će se fizičko lice.

IX. PRIJELAZNE I ZAVRŠNE ODREDBE

Član 140.

Obaveza usklađivanja poslovanja

Svi priređivači igara na sreću koji na dan stupanja na snagu ovog zakona posjeduju odobrenje za priređivanje igara na sreću izdato u skladu sa Zakonom o igrama na sreću („Službene novine FBiH“, br. 01/02 i 40/10), nastavljaju raditi do isteka trajanja odobrenja, bez mogućnosti produženja odobrenja, uz obavezu da od dana stupanja na snagu ovog zakona pa do isteka važećeg odobrenja usklade svoj rad, akte i poslovanje s odredbama ovog zakona.

Član 141.

Započeti postupci

Svi postupci po zahtjevima za izdavanje odobrenja koji su započeti prije stupanja na snagu ovog zakona u kojima nije doneseno konačno rješenje, dovršit će se u skladu sa odredbama ovog zakona.

Svi postupci započeti u vezi s davanjem odobrenja za priređivanje nagradnih igara u kojima nije doneseno konačno rješenje, dovršit će se u skladu sa odredbama ovog Zakona.

Član 142.

Provedbeni propisi

Provedbene propise predviđene ovim zakonom donijet će Ministar najdalje u roku od devet mjeseci od dana stupanja na snagu ovog zakona.

Član 143.

Prestanak primjene važećih propisa

Danom stupanja na snagu ovog zakona prestaje da važi Zakon o igrama na sreću („Službene novine **Federacije** BiH“, br. 01/02 i 40/10).

Član 144.

Ovaj zakon stupa na snagu osmog dana od dana objavljivanja u "Službenim novinama Federacije BiH".

O B R A Z L O Ž E N J E

I. USTAVNI OSNOV

Ustavni osnov za donošenje ovog zakona sadržan je u članu III. 1. tačka c), koji je izmjenjen amandmanima VIII, LXXXIX i CVI i članu IV. A. 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije, donošenje propisa o finansijama i finansijskim institucijama Federacije i fiskalna politika Federacije, a Parlament Federacije, uz ostale ovlasti predviđene Ustavom, odgovoran je za donošenje Zakona o obnašanju dužnosti federalne vlasti..

II. RAZLOZI ZA DONOŠENJE ZAKONA

Zakon o igrama na sreću donesen je u decembru 2001. godine i objavljen u „Službenim novinama Federacije BiH“, broj 1/02. Od tada pa do danas jednom su vršene izmjene i dopune osnovnog teksta, i to na osnovu donesenog Zakona o izmjenama i dopunama Zakona o igrama na sreću objavljenog u „Službenim novinama Federacije BiH“ broj: 40/10. Ovim izmjenama i dopunama je izvršena izmjena ili dorade postojećih zakonskih rješenja u pogledu drugačijeg načina definiranja raspodjele sredstava iz ostvarenog prometa Lutrije Bosne i Hercegovine koji pripadaju Federaciji, zatim je utvrđen način iznalaženja stabilnih sredstava u okviru Zakona o igrama na sreću za finansiranje organizacije Crvenog križa, Merhameta DD, Caritasa i Dobrotvora. Također, određene izmjene bilo je neophodno izvršiti i u cilju poboljšanja važećih zakonskih rješenja, odnosno stvaranja normativne osnove za primjenu tehničkih rješenja koja omogućavaju neposredno praćenje zakonitosti rada kladionica od strane Porezne uprave Federacije BiH

Međutim, imajući u vidu činjenicu da se od dana stupanja na snagu važećeg zakona pa do danas, na tržištu uveliko povećao broj priređivača i vrsta igara koje se priređuju, dolazimo do zaključka da važećim Zakonom o igrama na sreću nisu adekvatno i u dovoljnom obimu propisani uslovi, način i subjekti priređivanja igara na sreću, vrste igara na sreću kao i sistem nadzora nad priređivačima igara. U vezi sa prednjim, Također cijenimo da postoji realne pretpostavke da se propisivanjem drugačijeg osnova za plaćanje naknada za priređivanje igara na sreću obezbijedi značajno povećanje obima javnih prihoda koji se po ovom osnovu uplaćuju u Budžet Federacije Bosne i Hercegovine.

Nakon analize stanja na tržištu priređivača igara na sreću, kao i obima i sadržaja odredbi važećeg Zakona, dolazi se do zaključka da postoji potreba za sveobuhvatnijim zakonskim uređenjem oblasti igara na sreću. Shodno tome, u odnosu na odredbe važećeg Zakona, predloženim rješenjima sadržanim u ovom prednacrtu zakona o igrama na sreću, između ostalog drugačije uređuju pojedina pitanja iz ove oblasti, te se Također uređuju i brojna pitanja koja nisu bila uređena važećim Zakonom.

U kontekstu navedenog, ovim zakonom se između ostalog:

- (1) propisuju najvažniji tehnički i drugi uslovi za priređivanje posebnih igara na sreću (igre u kasinu, klađenje i igre u posebnim automat klubovima), i daje se zakonski osnov za donošenje nekoliko pravilnika kojima će se detaljnije propisati obaveze priređivača
- (2) za razliku od odredbi važećeg Zakona, predviđeno je da se za finansiranje programa i projekata iz oblasti rada i socijalne politike, obrazovanja, zdravstva, kulture i sporta, osim dijela sredstava koja Lutrija BiH uplati po osnovu naknada za priređivanje klasičnih igara, izdvaja na poseban podračun FMF i 50% od sredstava prikupljenih po osnovu uplate naknada za izdavanje odobrenja priređivačima
- (3) omogućava se postizanje efekata višestrukog povećanja prihoda koji će se ubirati po osnovu naknada od priređivanja igara na sreću (propisani su veći iznosi fiksnih naknada za izdavanje odobrenja koje plaćaju priređivači, a novina u ovom zakonu je i propisivanje obaveze uplate mjesečne naknade u iznosu 5% od ukupnog prometa kasina, od svake uplate za igru klađenja i od osnovice koju čini zbir dnevnih obračuna svih automata.
- (4) predviđa se drugačiji način oporezivanja dobitaka u klasičnim igrama na sreću i kladioničkim igrama, u smislu smanjivanja ukidanja neoporezivog iznosa kod kladioničkih igara gdje bi se oporezivao svaki dobitak, i uvodi se diferencirane stope poreza na dobitke od 10% i 15%, dok se iznos neoporezivog osnova kod klasičnih igara na sreću sa 100 KM smanjuje se na 50 KM
- (5) propisuje obaveza da svi priređivači igara na sreću moraju imati Centralni računarski sistem (Server) za on – line nadzor koji će omogućiti neprekidnu direktnu on-line vezu svih uplatno isplatnih mjesta, odnosno automata sa serverom Porezne uprave, čime će se omogućiti uspostava sistema nadzora i kontrole cjelokupnog ostvarenog prometa priređivača igara na sreću
- (6) detaljnije se uređuje cjelokupna procedura za izdavanje odobrenja za priređivanje svake pojedine igre na sreću čije priređivanje je dozvoljeno u skladu sa ovim zakonom, na način da se propisuju strožiji uslovi koji moraju biti ispunjeni od strane podnosioca zahtjeva za izdavanje odobrenja. Također, taksativno su propisane i okolnosti usljed čijeg nastanka se oduzima izdato odobrenje za priređivanje igara na sreću.

- (7) u cilju lakšeg tumačenja odredbi ovog zakona, daju se definicije najvažnijih pojmova iz oblasti igara na sreću,
- (8) kaznene odredbe su propisane na način da su propisani visoki iznosi zapriječenih kazni. Također su proširene odredbe o radnjama činjenja i nečinjenja koje se smatraju prekršajem u smislu ovog zakona.
- (9) detaljnije se uređuje pitanje vršenja nadzora nad sprovođenjem odredbi ovog zakona (Ministarstvo i Porezna uprava)
- (10) predviđa se mogućnost priređivanja pojedinih vrsta igra na sreću putem interneta za priređivače koji uz ispunjavanje Zakonom propisanih uslova već posjeduju odobrenje izdato u skladu sa Zakonom

S tim u vezi, u namjeri da se pravnim rješenjima sadržanim u odredbama teksta ovog zakona postignu navedeni ciljevi, zaključili smo da bi zbog obima novih zakonskih rješenja, bilo nesvrishodno predlagati nove izmjene i dopune postojećeg Zakona, te smo shodno tome sačinili Prednacrt novog Zakona o igrama na sreću, u cilju slanja u redovnu proceduru donošenja.

III. OBRAZLOŽENJE PREDLOŽENIH PRAVNIH RJEŠENJA

ČI. 1.- 3.

POGLAVLJE I – OPĆE ODREDBE

Propisuje se predmet ovog zakona, lica putem kojih se realizuje priređivanje igara na sreću, daje se definicija pojma „igra na sreću“ i definicije najznačajnijih pojmova koji se koriste u ovom zakonu.

ČI. 4. i 5.

Utvrđuje se osnovna podjela igara na sreću u smislu ovog zakona i date su definicije po vrstama igara. Zatim se definiše učesnik u igrama na sreću gdje se navode uslovi koji moraju biti ispunjeni za učestvovanje u igrama na sreću, lica koja ne mogu biti učesnici igara na sreću,

ČI. 6.,7. i 8.

Utvrđuje se visina i način obračuna i plaćanja naknade za priređivanje klasičnih igara na sreću od strane Lutrije Bosne i Hercegovine. Ovdje je bitno naglasiti da se navedena odredba odnosi isključivo na Lutriju BiH, koja ima status privrednog društva čiji je osnivač Federacija BiH u kome Vlada Federacije BiH vrši sva prava i dužnosti osnivača. Nadalje, uređuje se način usmjeravanja polovine sredstava od pomenute naknade koju uplaćuje Lutrija Bosne i Hercegovine kao i naknada za izdavanje i produženje odobrenja koju plaćaju drugi priređivači.

Ovdje je bitno istaći da za razliku od važećih zakonskih rješenja, ovim zakonom se osim sredstva koje uplaćuje Lutrija BiH, za finansiranje navedenih programa i projekata predviđa izdvajanje i 50% od sredstava prikupljenih po osnovu uplate naknada za izdavanje odobrenja ostalim priređivačima. Ovakvo zakonsko rješenje će za rezultat imati znatno povećanje ukupnog iznosa sredstava koji se izdvaja za pomenute namjene.

Nadalje, propisuje se oporezivanje dobitaka u klasičnim igrama na sreću iznad iznosa neoporezive osnovice od 50,00 KM. Uvodi se diferencirana stopa od 10% odnosno 15% u zavisnosti od visine ostvarenog dobitka. Ovo iz razloga što smatramo da veći dobitci moraju biti više i oporezovani.

Čl. 9.-14.

Uređuje se način prenošenja prava priređivanja igara na sreću sa Federacije na pravna lica, i precizirano je koje vrste igara na sreću pod uslovima propisanim ovim zakonom mogu priređivati pravna lica kojima je dato pravo priređivanja. Nadalje, uređuje se postupak izdavanja i oduzimanja odobrenja, na način da se odobrenje daje i oduzima na osnovu Rješenja ministarstva čiji se sadržaj Također propisuje.

Propisuje se zabrana prenošenja stečenog prava priređivanja na druga pravna lica kao i postupak za odobravanje promjene vlasničke strukture kod priređivača koji pravo priređivanja stekao u skladu sa ovim zakonom.

Čl. 15. i 16.

Ovi članovi sadrže odredbe o isključivom pravu Lutrije BiH na priređivanje klasičnih lutrijskih igara. Ugrađene su Također i odredbe o garanciji za isplatu dobitaka ostvarenim priređivanjem igara na sreću u smislu ovog zakona.

Čl. 17.-20.

Daje se definicija zabavnih igara koje se ne smatraju igrama na sreću, zatim se propisuje način i uslovi za priređivanja nagradnih igara.

Također su taksativno propisane zabranjene aktivnosti fizičkih i pravnih lica koje se odnose na oblast igara na sreću koja se uređuje ovim zakonom.

Čl. 21.- 31.

Navedene odredbe čine POGLAVLJE II. – LUTRIJA BIH

U ovom poglavlju uređuju se najvažnija pitanja koja su u vezi sa registracijom, djelatnosti, statusom i unutrašnjom organizacijom Lutrije Bosne i Hercegovine, kao i imenovanjem i sastavom nadzornog odbora Lutrije i rukovođenje društvom.

Čl. 32.- 54.

Navedene odredbe čine POGLAVLJE III. – KLASIČNE IGRE NA SREĆU.

U okviru istih, uređuju se sva najvažnija pitanja koja se tiču priređivanja klasičnih igara na sreću koje u skladu sa ovim zakonom priređuje isključivo Lutrija BiH. Shodno tome, propisuje se sadržaj pravila klasičnih lutrijskih igara na sreću, objava pravila, zatim mjesto, vrijeme i način izvlačenja dobitaka. Također, propisuje se i fond dobitaka, rok za isplatu istih, kao i štampanje srećaka odnosno listića.

Nadalje, taksativno su nabrojane i definisane vrste klasičnih igara koje se priređuju u skladu sa ovim zakonom kao i način priređivanja ovih igara na sreću.

U ovom poglavlju je ugrađena odredba kojom se predviđa donošenje podzakonskog akta kojim će se detaljnije urediti uslovi za priređivanje klasičnih (lutrijskih) igara na sreću i tombole bingo u zatvorenom prostoru.

Čl. 55.- 75.

Navedene odredbe čine dio POGLAVLJA IV. – POSEBNE IGRE NA SREĆU

U ovom dijelu zakona se uređuju pitanja u vezi sa priređivanjem jedne od zakonom predviđenih „Posebnih igara na sreću“ – igre u kasinima. Najprije se propisuje koja pravna lica i na koji način mogu priređivati igre na sreću u kasinima. Za pravna lica koja ove igre priređuju na osnovu Rješenja Ministarstva, predviđa se da su obavezni Ministarstvu podnijeti zahtjev za izdavanje prethodnog odobrenja za registraciju privrednog društva, gdje se precizira dokumentacija koja se podnosi uz zahtjev.

Nadalje se propisuju vrsta i obim igara koje se mogu priređivati u kasinu, gdje je između ostalog predviđeno da ako se u kasinu priređuju igre na sreću na automatima, priređivač je dužan imati Centralni računarski sistem (Server) za on-line nadzor koji mora biti povezan sa računarskim sistemom Porezne uprave na način da omogući uspostavu sistema nadzora. Na ovaj način će se omogućiti uspostava sistema nadzora i kontrole cjelokupnog ostvarenog prometa priređivača igara na sreću.

Osim naprijed navedenog, definisani su i drugi najvažniji prostorni i tehnički uslovi koji moraju biti ispoštovani kod priređivanja igara na sreću u kasinu.

Također, predviđa se i mogućnost preseljenja kasina na novu lokaciju i to nakon dobivanja odobrenja ministarstva po zahtjevu priređivača uz ispunjenje zakonom propisanih uslova. Uređuje se procedura za izdavanje odobrenja za priređivanje igara na sreću u kasinu, na način da su precizno propisani strogi uslovi koji moraju biti ispunjeni da bi priređivač dobio odobrenje. Predviđeno je da se odobrenje izdaje na period od pet godina.

Propisana je najniža visina osnivačkog kapitala za privredna društva registrovana za priređivanje igara na sreću u kasinima, kao i obaveza postojanja bankarske garancije ili namjenskog depozita radi osiguranja isplate dobitaka igračima i podmirenja obaveze po osnovu uplate javnih prihoda za cijeli period važenja odobrenja. Također, propisuje se i visina naknada koje priređivači plaćaju za izdavanje ili produženje odobrenja kao i godišnja naknada po jednom kasinu.

Osim navedenih naknada, novinu u odnosu na postojeća zakonska rješenja u ovoj oblasti predstavlja i obaveza plaćanja mjesečne naknade u iznosu 5% od ukupnog prometa kazina, što znači da će priređivači biti obavezni u Budžet Federacije uplatiti 5% od svake uplate igrača za učestvovanje u bilo kojoj od igara na sreću koja se priređuje u kasinu skladu sa ovim zakonom.

ČI. 76.- 96.

Navedene odredbe se odnose na priređivanje jedne od zakonom predviđenih „Posebnih igara na sreću“ – kladioničkih igara. Prije svega se propisuju vrste kladioničkih igara, kao i koja pravna lica i na koji način mogu priređivati igre na sreću klađenja. Nadalje je propisan način primanja uplata za učestvovanje u igrama klađenja, gdje se predviđa uplata na uplatnim mjestima putem terminala i samoposlužnih terminala, kao i putem SMS poruke. Zatim, kao i kod drugih vrsta tzv. „Posebnih igara na sreću“, propisani su osnovni prostorni i tehnički uslovi za priređivanje kladioničkih igara, te su propisana klađenja koja su zabranjena u skladu sa ovim zakonom.

Uređuje se procedura za izdavanje odobrenja za priređivanje igara na sreću - klađenja, na način da su propisani strogi uslovi koji moraju biti ispunjeni da bi priređivač dobio odobrenje. Predviđeno je da se odobrenje izdaje na period od dvije godine. Propisana je najniža visina osnivačkog kapitala za privredna društva registrovana za priređivanje igara na sreću-klađenja, kao i obaveza imanja bankarske garancije ili namjenskog depozita radi osiguranja isplate dobitaka igračima i podmirenja obaveze po osnovu uplate javnih prihoda za cijeli period važenja odobrenja.

Priređivači igara na sreću klađenja prema navedenim odredbama plaćaju paušalne naknade za izdavanje ili produženje odobrenja, zatim za svako novo uplatno mjesto kao i naknade po svakom samoposlužnom terminalu i kompjuterskoj konfiguraciji sa dodatkom TV monitora, za priređivanje igara iz člana 79. ovog zakona.

Osim navedenih naknada, novina u odnosu na postojeća zakonska rješenja u ovoj oblasti predstavlja i obaveza plaćanja mjesečne naknade u iznosu 5% od svake

pojedinačne uplate igrača, što znači da će priređivači biti obavezni u Budžet Federacije uplatiti 5% od osnovice koju čini zbir svih pojedinačnih uplata koje uplaćuju igrači na uplatnim mjestima, terminalima i putem SMS poruke.

Nadalje, propisuje se oporezivanje dobitaka ostvarenih u kladioničkim igrama na sreću i to uvođenjem diferencirana stope od 10% odnosno 15% u zavisnosti od visine ostvarenog dobitka. Ovo iz razloga što se smatra da veći dobitci moraju biti više i oporezovani. Za razliku od oporezivanja dobitaka ostvarenih u klasičnim igrama, kod dobitaka ostvarenih u kladioničkim igrama predviđa se oporezivanje svakog dobitka bez obzira na njegovu visinu.

Čl. 97.- 113.

Navedene odredbe se odnose na priređivanje jedne od zakonom predviđenih „Posebnih igara na sreću“ – igara na sreću na automatima. Po istom principu kao i za druge vrste Posebnih igara najprije se propisuje koja pravna lica i na koji način mogu priređivati igre na sreću na automatima. Zatim, su propisani osnovni prostorni i tehnički uslovi za priređivanje igara na automatima.

Uređuje se procedura za izdavanje odobrenja za priređivanje igara na sreću na automatima, na način da su propisani strogi uslovi koji moraju biti ispunjeni da bi priređivač dobio odobrenje. Predviđeno je da se odobrenje izdaje na period od dvije godine. Propisana je najniža visina osnivačkog kapitala za privredna društva registrovana za priređivanje igara na sreću na automatima, kao i obaveza imanja bankarske garancije ili namjenskog depozita radi osiguranja isplate dobitaka igračima i podmirenja obaveze po osnovu uplate javnih prihoda za cijeli period važenja odobrenja. U vezi sa prednjim, potrebno je istaći da iznos bankarske garancije (namjenskog depozita) nije propisan u jednakom iznosu za sve priređivače, već je predviđeno da se vezuje za ukupan broj automata koje pojedini priređivač instalira na osnovu odobrenja ministarstva.

Priređivači igara na sreću na automatima plaćaju paušalne naknade za izdavanje i produženje odobrenja po svakom posebnom automat klubu kao i po svakom postavljenom automatu.

Također, kao i kod drugih posebnih igara, osim navedenih naknada, predviđeno je i plaćanja mjesečne naknade u iznosu 5% od ukupnog prometa na automatima.

ČI. 114-124.

Ove odredbe predstavljaju POGLAVLJE V. – „PRIREĐIVANJE IGARA NA SREĆU PUTEM INTERNETA“, gdje se propisuje mogućnost priređivanja pojedinih vrsta posebnih igara na sreću putem interneta na osnovu posebnog odobrenja Ministarstva za priređivače koji već posjeduju važeće odobrenje izdato u skladu sa zakonom.

Predviđeno je da će ministar podzakonskim aktom propisati vrste i obim igara na sreću koje se mogu priređivati putem interneta. Nadalje, propisuju se osnovni prostorni i tehnički uslovi za dobivanje posebnog odobrenja Ministarstva. Zatim se propisuje procedura za izdavanje odobrenja, uslovi za dobivanje odobrenja (visina osnivačkog kapitala i visina bankarske garancije) kao i naknade koje plaćaju priređivači.

ČI. 125. - 127.

Ove odredbe čine POGLAVLJE VI. pod nazivom: „POSEBNE OBAVEZE PRIREĐIVAČA“. Ovim odredbama se propisuje obaveza za sve priređivače igara na sreću u smislu ovog zakona, da se u svom radu moraju pridržavati propisa o sprečavanju pranja novca i finansiranja terorizma, posebno u slučajevima „tzv. sumnjivih transakcija. Također se propisuje obaveza čuvanja tajnosti podataka o igračima i njihovom učešću u igrama kao i zabrana oglašavanja igara na sreću u medijima namjenjenim djeci i omladini.

ČI. 128. - 134.

Ove odredbe čine POGLAVLJE VII. pod nazivom: „ NADZOR “ i u istim se uređuje vršenje nadzora nad primjenom ovog zakona, od strane Porezne uprave i Ministarstva.

ČI. 135. – 139.

Ove odredbe čine POGLAVLJE VIII. pod nazivom: „ KAZNENE ODREDBE “, gdje se propisuju činjenja odnosno nečinjenja koja se u smislu ovog zakona smatraju prekršajem, te se propisuje raspon odnosno najviša ili najniža kazna za svaki prekršaj.

Čl. 140. – 144.

Ove odredbe čine POGLAVLJE IX. pod nazivom „PRELAZNE I ZAVRŠNE ODREDBE“, kojima se uređuju najvažnija pitanja u vezi sa obavezom usklađivanja poslovanja svih priređivača u skladu sa ovim zakonom, okončanjem započetih postupaka, donošenjem provedbenih propisa i prestankom važenja dosadašnjih.

IV. - FINANSIJSKA SREDSTVA

Za implementaciju ovog zakona u Budžetu Federacije Bosne i Hercegovine potrebno je planirati i obezbijediti dodatna sredstva, u svrhu nabavke adekvatne opreme (servera) za Poreznu upravu, koja će se koristiti za on-line praćenje odnosno kontrolu rada priređivača na način kako je to predviđeno ovim zakonom. Također, potrebno je planirati i obezbijediti dodatna sredstva, u cilju kadrovskog jačanja i obuke zaposlenika Porezne uprave koji će raditi isključivo na poslovima kontrole rada priređivača igara na sreću, odnosno za formiranje posebne organizacione jedinice unutar Porezne uprave, što će u konačnici imati za cilj višestruko povećanje prihoda po osnovu obaveza na ime naknada i poreza od igara na sreću.

V. USKLAĐENOST SA PROPISIMA EVROPSKE UNIJE, EVROPSKIM PRINCIPIMA I STANDARDIMA

Obaveza usklađivanja zakonodavstva u ovoj oblasti, proističe iz odredbe člana 89. Sporazuma o stabilizaciji i pridruživanju (SSP), na osnovu koje je između ostalog ugovoreno da će saradnja ugovornih strana biti usmjerena ka prioritetima pravne stečevine Evropske unije (acquis) u području bankarstva osiguranja i drugih finansijskih usluga, te da će u tom smislu ugovorne strane saradivati radi uspostave odgovarajućeg okvira za poticanje bankarskog, osiguravajućeg i sektora ostalih finansijskih usluga.

Također, i članom 98. SSP-a je ugovorena uspostava saradnje u oblasti oporezivanja, što će za cilj imati između ostalog i suzbijanje štetne konkurencije u oporezivanju, efikasnije ubiranje poreza i provođenje mjera kojima se sprečavaju poreske prevare, utaje ili izbjegavanje poreza.

Nadalje, u vezi sa obavezama propisanim odredbama sekundarnih izvora prava Evropske zajednice, kao jedna od najvažnijih aktivnosti nameće se potreba usklađivanja ovog zakona sa pravnom stečevinom EU u dijelu koji se odnosi na sprečavanje pranja novca.

S tim u vezi, uvažavajući odredbe **DIREKTIVE 2005/60/EC** Evropskog parlamenta i Vijeća od 26. oktobra 2005. o prevenciji upotrebe finansijskog sistema u svrhe pranja novca i finansiranja terorizma (CELEX oznaka: 32005L0060), u tekst Prednacrta ovog zakona ugrađene su odredbe vezane za provjeru stvarnog vlasnika društva (priređivača) na način da se predviđa obavezno provođenje postupka o odlučivanju o zadržavanju prava na priređivanje igara u slučaju promjene vlasničke strukture (traži se obavezno prilaganje potvrde banke o izvršenoj provjeri porijekla sredstava uplaćenih za kupovinu vlasničkog udjela, kao i drugi podaci o članovima uprave kasina, odgovornim licima i drugim zaposlenim).

Nadalje, u tekst Nacrta zakona ugrađene su odredbe o utvrđivanju i provjeri identiteta posjetilaca u kasinima, zatim o obavezi svih priređivača da postupaju u skladu sa propisima kojima se uređuje sprečavanje pranja novca i finansiranja terorizma, a posebno u slučaju sumnjivih transakcija (data je i definicija sumnjive transakcije). Također, u cilju usklađivanja sa odredbama navedene direktive, ugrađene su i odredbe prema kojima se u svrhu dobijanja odobrenja propisuje obaveza dostavljanja podataka o osnivačima i ovlaštenim osobama, zatim se propisuje provođenje pojačanog nadzora i inspeksijske kontrole kasina kao i kaznene sankcije.

Shodno prednjem a imajući u vidu obavezu propisanu odredbom člana 3. stav 2. Uredbe o Uredu Vlade Federacije Bosne i Hercegovine za zakonodavstvo i usklađenost sa zakonodavstvom Evropske unije („Službene novine Federacije BiH“ broj: 49/07), sačinili smo na propisanim obrascima Uporedni prikaz i Izjavu o usklađenosti (ovjerena), koje vam dostavljamo u prilogu.

